

चेतचन्द्रिका ।

अर्थात्

श्री बैकुण्ठवासी महाराजा चेतसिंह की आ-
ज्ञानुसार श्री रघुनाथ कवि के पुत्र गोकुल-
नाथ कवि कृत सविधि अलंकार वर्णन ।

‘नित्य अन्धात है क्षीरधि में ससि तो मुख की
समता लहिबे को’

श्रीयुत बाबू चन्द्रेश्वरप्रसाद सिंह रईस चै-
नपुर जिला कपरा के प्रसन्नतार्य डुमराँव-
निवासी नकछेदी तिवारी द्वारा प्रकाशित ।


यह पुस्तक काशी भारतजीवन प्रेस के अधिकार से
छपी और उसी प्रेस में मिलैगी ।

काशी ।

भारतजीवन प्रेस में मुद्रित हुई ।

सन् १८८४ ई० ।

चेतचन्द्रिका



कवित्त ।

सिंदूरभरो भसुंड एक दन्त सोहै मानो
जस जगदीश ताको दोसै बड़ी रती को । रिझि
लए भिझि लए सुमति समृद्धि लए लम्बीदर
लोनो है सदन सरस्वती को ॥ चारौ फलदा-
यक सहायक है साँकरे यों सिद्धये चरन दूहै
मति महामती को । गोकुल कहत महादेव को
लड़ाइतो है गजमुख चन्दभाल लाल पारवती
को ॥ १ ॥

अपरञ्च ।

कटै चयताप दाप व्यापै भवभय की न
कलुष नसात गन मिटत कलिस के । सुबुधि
बढ़ति मुख लालिमा चढ़ति चारु कुमति उठति
तम देखि ज्यों दिनेस के ॥ गोकुल कहत गुनगन
सरसत वर मोद दरसत जस गावैं सब देस के ।

धाम बीच बसै आइ कमला अचल है कै सेवत
विमल पदकमल गनैसके ॥ २ ॥

अथ गुरुचरणस्तुति ।

दारिदरन भवभयउधरन चारु बारिज-
वरन मन मधुप थितौतहीं । कामना-भरन
फरे चारिह्न फरन अंधतिमिरहरन रवि रूप
से हितौतहीं ॥ गोकुल कहत मोद महत ल-
हत जन जितार्ह चहतु है रहतु है तितौतहीं ।
औठरठरन असरन के एरन महामंगलकरन
गुरुचरन चितौतहीं ॥ ३ ॥

दोहा ।

भजत पंथ बलिभद्र गुरु के धरि पद पर माथ ।
भयो कृतारथ जगत मे मतिमत गाकुलनाथ॥४॥
दरन सकल भवभय लखें भरन मोद मनरंज ।
भुवनेस्वरि जगदम्ब के थपु हिय सर पदकञ्ज॥५॥
श्रीगुरुपदचरनन कियो द्रष्ट चरन दरदंद ।
अब मै वरनन करत हौं ध्यान सहित नदनंद॥६॥

अथ श्रीकृष्ण की ध्यान - कवित्त ।

पिथरी पगिया पर मोरपखा गति बायु
लगे चल भावत है । परि गोधनरेनु रहौ मुख पै
बढ़ि खेदकनों कृबि छावत है ॥ करि गाइन
गोकुल आगे हरे हरे बाँसुरी मंद बजावत है ।
इत आइ लखौ वह कारो अहीर की कालिंदी-
कूल ते आवत है ॥ ७ ॥

पेँच खुले पगरी के उड़ैं फिरें कुण्डल की
प्रतिमा मुख दौरी । तैसियै लोल लसैं जुलफैं
रत एही न मानति धावति धौरी ॥ गोकुलनाथ
किये गति आतुर चातुर की कृबि देखिन बौरी।
खालनि तें बढ़िजात चल्यौ फहराति कंधा
पर पीत पिछौरी ॥ ८ ॥

डोलि परै मग से पगरी पगरी तें खुले
तिमि पेच सुहावत । चंद सो आनन खेदभरो
मुकुले अरविन्दनै नैन लजावत ॥ गोकुल गीँजो
प्रसूनहरा लपटो हिये हेरि हियो हलसावत ।

कौन सोहागिनि को भरि भाग भरे अनुराग
चले हरि आवत ॥ ९ ॥

ललित कपोलनि पै कुंडल कलित लोल
कूटे काकपक्ष ते वै डोलै लगे बात है । लटपटी
पौरी पाग पर सोहै मोरपक्ष भूपकोले अक्ष मु-
कुलित जलजात है ॥ गोकुल किसोर वह कौन
को कहां को हैरी चित चढ़ि गयो मेरे ककु न
सोहात है । जात कुञ्जघातें जमुना को हैं
विलोक्यौ आजु साँवरो सो लटपटे पगनि प्र-
भात है ॥ १० ॥

गोधन ते जमुना की ओर तें हमारी खोरि
आइ गयो छाड़ छवि मुकुट विमाल को । गौ-
वन को घेरनि लकुट की सुफेरनि ल्यों बाँसुरा
को टेरनि लफनि वनमाल को ॥ गोकुल कहत
पीतपट की चटक चारु भौंहन को मटक
लटक लोनी चाल की । भूलति न ता खिन तें
गड़ि रही आँखिन में साँवरी सलोनी वह मू-
रति गोपाल की ॥ ११ ॥

अथ कविप्रशंसा—दोहा ।

मनवचकर्मनि कै करै सबहौ को उपकार ।
लहत मुकवि या जगत में ज्यों सुरसरि की धार ॥
ऐसो सरल सुभाव लखि बुधजन को सुखदान ।
जथा उक्ति हौंहूं करी कविता सुनहु सुजान ॥१३
सोरठा ।

लखि जग को व्योहार, भ्रम तजि हौं कविता करी ।
मनि मोतिन के हार, लेत लेत कीउ पोति के ॥१४
मनि गुन अगुन बिचार, जानत जे जग जीहरी ।
कह जानत मनिहार, मनिहारन के मोल गुन ॥१५

अथ वंसवर्णन—दोहा ।

ब्रम्हा के मनुते भयो गौतम मुनि तपथान ।
ज्यों हर के गननाथजू ज्यों कश्यप के भान ॥१६॥
गौतम के कुल में भयो कीदूमिश्र महान ।
तेजपुंज तपधाम यों ज्यों बसिष्ठ भृगुभान ॥१७॥

कवित्त ।

प्राणायाम साधै अवराधै परमात्मा को गौतम
के कुल को कमल सो गुनी परै । जाको नाम

लित देत खेद तीनों तापन के देह मे ते पापन
को पुन सो धुनो परै ॥ गोकुल कहत द्विजराज
द्विजराज बंस साधुमनहंसन को आनद पुनो
परै । महा तपधाम अभिराम जगती मे आज
ऐसो कीदू मिसिर को सुजस सुनो परै ॥१८॥

दोहा ।

तपवर कीदू मिसिर को वरनि कहाँ लो जाइ ।
धोती जाकी बायु बस नभ मे परी भुराइ ॥१९॥
कासिराज तिनको दियो परम दतरियाग्राम ।
ज्यों कुवेर को हर दर्ई अलकापुरी ललाम ॥२०॥
कुल मे कीदूमिस्र के भये जीवधन भूप ।
ज्यों क्षीरधि के कामतरु सुधासुधा सु अनूप ॥२१॥

कवित्त ।

देवद्विज पूजे परमात्मा को कूजै सौँहैं ल-
गत न दूजै और भूप बने इन के । गुनी गुनगाहै
ध्रुवधरम उमाहै खग खिलन सो वाहै अरि
चाहै सोहरन के ॥ गौतम अमान महादानि
बाहुबल वीर गोकुल निहाल करै दीन देखे कुन

के ! मनको प्रयोधि लखे सोधि भलीभाँतिन
सों अगन सघन गुनगन जीवधन के ॥ २२ ॥

दोहा ।

ऐसे जिवधन के भये मनरञ्जन धनधाम ।
पुरुसोत्तम के काम ज्यों ज्यों दशरथ के राम ॥ २३ ॥

कवित्त ।

धरमधुरंधर पुरंदर मही को महाजङ्ग जुरे
मंदर सो पालक मुनीन को । गोकुल मुकवि
जस पढ़त जगत जाको चन्द्रमा सो चारु चढ़ो
सरद पुनीन को ॥ दीहद्वानि गौतम को की-
रति लता को लखो वरस हजारन लौं सुमन
लुनीन को । वैरिन को गंजन है भंजन दरिद-
दीह रंजन करत मनरंजन गुनीन को ॥ २४ ॥

दोहा ।

मनरंजन के यों भये भूपति संसाराम ।
सैनानी हर के भये पुरुसोत्तम के काम ॥ २५ ॥

कवित्त ।

रजत को धरा धराधर करपूर कैसे नीर सब

छीर होत सुखमा की रुख तें । समनममूह
 होत मालती के जूह लखे दोस कैसे चन्द होत
 मंद अरि दुख तें ॥ गोकुल कहत निसि दोस
 रैन राका होति कुमुद से नैन सबही के भरे
 सुख तें । महाराज मंसाराम राइ को पढ़त जस
 सुधा कैसी धारा स्रवै कविन के मुख तें ॥ २६ ॥

दोहा ।

ऐसे मंसाराम के महाबोर बरिवण्ड ।
 उयो उदैगिरि ते मनोग्रीष्म तरनि प्रचण्ड ॥ २७ ॥

कवित्त ।

साधुन को पूजै परमारथ को कूजै सोहैं
 गनत न दूजै रनपर तें प्रचण्ड के । सज्जन को
 पालै खलदलन को घालै हिये भूपन के सालै
 सदा जोरे भुजदण्ड के ॥ गोकुल हरत दीन-
 दारिद्र को देखतहीं पेखतहीं जे न देत दण्ड ते
 अदण्ड के । पावै कौन पूरन पयोनिधि को
 पार कौन गावै गुन सिंगरे महीप बरिवण्ड
 के ॥ २८ ॥

साहस को सायर है साहिर सुबुद्धि न मे
तीछन प्रताप लखें लखें भारतण्ड सो । गुरुता
का बिन्ध सिन्धु पानिप को सूरता को कूरता
को काटि कै करत खण्ड खण्ड सो ॥ गोकुल
सुकवि सदा दोनतरुवरनि पै कंचन वरस हुतो
धन के घमण्ड सो । मण्डन मही को खल-
दलन को खण्डन है आजलों न भयो भया भूप
वरिवण्ड सो ॥ २६ ॥

दोहा ।

मिल्यो नृपति वरिवण्ड सो महासुकवि रघुनाथ ।
ज्यों गुरु गुरुता सों भयो रहत सुरप्पति साथ ॥ ३० ॥
काशी में रघुनाथ कवि प्रगव्यो सुमति अमन्द ।
विक्रम के बैताल ज्यों पृथीराज के चन्द ॥ ३१ ॥
करे ग्रन्थ अनगनित जिन शास्त्रन के अनुसार ।
अलङ्कार रस नाट्यका सहित छन्दविस्तार ॥ ३२ ॥
आदर करि वरिवण्ड नृप राख्यो कवि रघुनाथ ।
दे हय गय रथ पालको दीन्हे अगनित गाथ ॥ ३३ ॥

दिथो ग्राम चौरा तिन्हे सुरसरिता के तीर ।
 सुरसरिता सी बसति जहँ समति सुमति की भीर
 सुकवि सहित बरिवण्ड नृप करि काशी को राज ।
 तन तजि काशीस्वर भए सहकवि आनद-साज ॥
 द्वै सुत नृप बरिवण्ड के भए भरे मतिगाथ ।
 जैसे शंकर के भए सैनानी-गननाथ ॥ ३६ ॥

सोरठा ।

जेठे नृप अबतंस, चेतसिंह राजा भए ।
 पालत भुवदुज वंस, घालत जे खलदल सबल ॥ ३७ ॥
 लहुरे सिंह सुजान, महाबली दाता सुमति ।
 जानत कछू न आन, चेतसिंह को हुकुम द्रव ॥

चेतसिंह को रूपवरनन ।

नौतन चेत महीप चितै मन बैरिन के धरै
 धीरज धम्यन । गोकुल साधु रहै सुख सों खल
 के कुल भागि बसै गिरिरम्यन ॥ सेवक फूल भरे
 अनकूल भए प्रतिकूल ते कौन से अम्यन । कूटि
 परै धनु बीरन के तरुनीन के टूटि परै कटि-
 वम्यन ॥ ३८ ॥

स्वभाववर्णन ।

ध्याइ गुरुचरन अन्हाइ सुरसरिता में
लक्ष्मीनारायन को पूजै साधु संग में । सभा
बीच बैठे आइ येँठे मन मोहन को सुभट स-
लाम लेत साहिबी उमंग में ॥ गोकुल सिकार
खिलै केहरि कुरंगन को भूप चेतसिंह हनै वै-
रिन को जंग में । कलावान कविनसों कविता
को टंग देखि संग तरुनीन के रमत रतिरंग
में ॥ ४० ॥

दोहा ।

भए सुकवि रघुनाथ के तोनि पुत्र अभिराम ।
क्रियावान उज्जल रहनि काव्यकला के धाम ॥ ४१
वैजनाथ सब सों बड़े मध्यम गोकुलनाथ ।
लघु गुरु गुरुता को धरै विष्णुनाथ जुतगाथ ॥ ४२
गोकुल कवि पर करि कृपा चेतसिंह कितिपाल ।
गाँव दियो घारे दए दीन्हें दुरद विसाल ॥ ४३ ॥
फेरि सुकवि सों यों कह्यो करिकै अमित सनेहु
अलंकार मत में हमै ग्रन्थ एक करि देहु ॥ ४४ ॥

सोरठा ।

सुने नृपति के बैन गोकुलनाथ कृपा भरे ।
पाइ हियै मे चैन ग्रन्थ करन लागि तुरत ॥४५॥

अथ अलंकार के नाम ।

प्रथम एक उपमा कहौं कहौं अनन्वय एक ।
उपमानो उपमेय द्वक लहियत सहित विवेक ॥
पांच प्रतीप कहैं सुकवि षट रूपक के रूप ।
द्वक परिनाम उल्लेख द्वै सुस्मृत एक अनूप ॥४७॥
भांति एक सन्देह द्वक आपन्हति षटभेव ।
उल्लेखा षटभेद सों बरनत है कविदेव ॥४८॥
आपन्हव है एक औ षट सयोक्ति अनुमानि ।
तुल्यजोगिता चारि है दीपक चारि बखानि ॥
प्रति वस्तु उपमा सुद्वक है दृष्टांत सुएक ।
कहियत तीनि निदर्शना द्वक व्यतिरेक विवेक ॥
एक सहोक्ति विनोक्ति द्वै समासोक्ति द्वक जानि ।
परिकर कहियै एक द्वक परिकुरांकुरहि मानि ॥
तीनि भेद अश्लेष के बरनत हैं सुखधाम ।
अप्रस्तुतपरसंस को एक भेद अभिराम ॥५२॥

प्रस्तुतांकुरो एक द्वै परजायोक्ति अमन्द ।
 द्वै व्याजोक्ति अछेप के तीन भेद दरदन्द ॥५३॥
 एक विरोधाभास है षट् विभावना होति ।
 विसेषोक्ति दूक दूक कहै आसम्भव को जोति ॥
 आसंगति है तौनि औ सात विषम के रूप ।
 तीन भेद सम के महत एक विचित्र अनूप ॥५४॥
 अधिक दोड़ है अल्प दूक अन्योन्या है एक ।
 विसेसोक्ति के कहत हैं तीन भेद गहि टेक ॥५५॥
 दोड़ कहत व्याघात कवि कारनमाला एक ।
 एक भेद एकावली माला दोपक एक ॥५६॥
 सार एक क्रमिका सुदूक द्वै परजाय सुरीति ।
 परिवृत एक कहैं सुकवि परिसंख्या दूक रौति ॥
 एक विकल्प कहैं सुकवि द्वैहि समुच्चै भेद ।
 कारकदीपक एक है दूक समाधि हरखेद ॥५७॥
 प्रत्यनीक वरनन करत अलङ्कार दूक रौति ।
 काव्यार्थापत्ति एक विध कहत सुकवि करि प्रीति ॥
 काव्यलिंग दूक कहत हैं द्वै अर्थान्तरन्यास ।
 एक विकस्वर एक विध है प्रौढाक्ति उजास ॥५८॥

एक भेद सम्भावना इक मिथ्याध्यवसीत ।
 ललित एक है तीन विधि परहरषन सुभरीत ॥
 एक विषादन चारि विधि है उल्लास अमन्द ।
 आवज्ञा है एक औ एक अनुज्ञा चन्द ॥६३॥
 ले सायक मुद्रा सुयक एकावली सुरीति ।
 तदगुन इक इक अनगुनो कहत मिलित इक रीति
 एक कहत सामान्य कवि औ उन्मीलित एक ।
 और एक बैसेष्य इक गूढोत्तर गहि ठेक ॥६५॥
 चिचातर इक एक है सूक्ष्म पीहित एक ।
 इक व्याजोक्ति गुढोक्ति इक विवृतोक्ति विधि एक॥
 जुक्ति एक लोकोक्ति इक इक छेकोक्ति सुढंग ।
 काकु एक वक्रोक्ति इक सुभावोक्ति सुभ अंग॥६७॥
 भाविक एक उदात्त है एक उत्तरा होत ।
 पूर्वरूप अत्युक्ति इक एक कहत कविगोत ॥६९॥
 प्रेमात्युक्ति निरुक्ति इक एक भेद प्रतिखेद ।
 विधि इक कहियत हेत इक अलङ्कार हित भेद॥
 इति अलङ्कारों के नाम ।

आनंद देत चकोर हितून को है खल को-
 कन को दुखयारो । कन्त है सन्त कुमोदन को
 कल चाँदनी कित्ति महा सितभारो ॥ गोकुल
 सील सुधा सरसै बरसै सुख है अतिही उजि-
 यारो । मन्द करै अरविन्दन को जस चन्द सो
 चेत महोप तिहारो ॥ ७४ ॥

सोरठा ।

उदै सूर सों भाल, सिंदूरघसो गनेस को ।
 हरत बिघन को जाल, जो जगव्यापक तिमिर को॥

अनन्वय लक्षण ।

उपमा उपमेयत्व जहँ एक वस्तु मे हीत ।
 नियत न वर्ण्य अवर्ण्य को सोऽनन्वय सुखसोत७५
 जया ।

मोहन के मन मोहन को पढ़ि मोहनिमंत्र
 को तंत्र लही हौ । रूप की रासि समेटि सबै
 नख तें सिखलौं लै लपेटि रही हौ ॥ गोकुल को
 तुम सौ ब्रज मे तरुनी तिय मे सिरताज कही
 हौ । भागभरौ खुमसी मुख सो उमसी सु-
 खमा तुम सी तुमही हौ ॥ ७७ ॥

कवित्त ।

सुंदर सुसील सरवग्य साहिबी को सिंधु
भारी भुजदण्डन को भूप सिरताज है । औठर-
ठरन असरन को सरन सदा दुवनदरन जाके
करन के काज है ॥ गोकुल सुकवि कहै महा-
दानि दीनन को सुकवि प्रवीनन को पालत
समाज है । कामै गुन पावै जाहि तोमै सरिसा-
है सुनो चेत सिंह ऐसी चेतसिंह महाराज है ॥७८॥

सोरठा ।

तोसी तुही न आन, लखी सुंदरी तरुनि तिय ।
हरि सौतिन को मान, तू बस कियो मुजान पिय ॥

उपमानोपमेय लक्षण ।

उपमा को उपमेय करि फिरि ताको उपमान ।
उपमानो उपमेय तहँ बाचक धर्म समान ॥८०॥

यथा ।

प्रीतम के चख चारु चकोरन दै मुसुकानि
अमी करै चरो । रूप रसै बरसै सरसै नखता-
वलि लौं मुकुतावलि घेरो ॥ गोकुल को तन-
ताप हरै सब जौन भरै रवि काम करेरो । तो

मुख सो ससि सोहत है बलि सोहत है ससि
सो मुख तेरो ॥ ८१ ॥

अपरञ्च कवित्त ।

कस्यप सो मारतण्ड चण्डकला मण्डल के
कस्यपौ हुते हो तेज पुंज मारतण्ड से । छीर
सिंधु ऐसी सुधासिंधु सुधासिंधु ऐसी छीरसिंधु
सोहत है लहरि घमण्ड से ॥ गोकुल कहन
सुने जनक सरिस एते और मै न लखि सुनो
भूपति उदण्ड से । भूप बरिवण्ड से महीप चेत-
सिंह भए तुमही कै तुम से महीप बरिवण्ड
से ॥ ८२ ॥

सोरठा ।

तो मुख ससि की जोर, ससि तो मुख सो ससिमुखी ।
पियचखचतुर चकोर, चाव चढ़े चाहत रहैं ॥

प्रतीप लक्षन ।

उपमा की उपमेय करि उपमेयै उपमान ।
जह वाचक अधवर्त्य के कहै प्रतीप सुजान ॥ ८४ ॥

यथा ।

जिनके पगपानि से पंकज ऊरु करी करकी

उपमा उपहै । लसै लंक सो चारि को अंक
उरोजनि सोहै सिरीफल सोच गहै ॥ कवि गो-
कुल कण्ठ सो कम्बु कलाधर सारदी साँभ के
साँभ चहै । उनके मुख सो ससि आजहि को
प्रिय प्यारे प्रवीन कहै तो कहै ॥ ८५ ॥

गौतम चेत महीप बली अपने भुज के बल
सों छिति पोसो । नास कछौ खल के दल को
बल सो लहि दोस कछू जब रोसो ॥ दीन नि-
हाल कछौ लखतै कवि गोकुलनाथ गुनीगन
मोसो । दानि महाफल चारि को होइगो जानि
परै कलपद्रुम तोसो ॥ ८६ ॥

सोरठा ।

तो पद से अनुमानि, अरुन अमल कोरे कमल ।
याही तें सनमानि, अवतंमित मोहन करे ॥ ८७ ॥

दुतीय प्रतीप ।

उपमा को उपमेय करि भयो वर्ण्य उपमान ।
लहत निरादर वर्ण्य सो दूजो सुनो सुजान ॥ ८८ ॥

यथा ।

दासी हों मै बलि रावरे की यह मेरी कही

है सही मति लूनी । पेखियै आज कलानिधि
 को कहि भँति कला धरि कै भयो दूनी ॥ गो-
 कुल कैसी सुधा बरसै सरसै सुखमा लहि सारदी
 पूनी । देखियै तौ चलि भावती के मुगुते ससि
 आजु को होत न उनो ॥ ८६ ॥

सोरठा ।

चित दै चित औ लाल, तरुन अमल फूले कमल ।
 उनके पगतेँ हाल, चलि बलि देखो सरबरै ॥ ८७ ॥

द्वितीय प्रतीप ।

भयो बर्न्य उपमान जो लाभ ताहि को होत ।
 लहत निरादर तीसरो बर्न्य अबर्न्य जु होत ॥ ८८ ॥

यथा ।

को अपनी मति को जड़कै मतिमन्दन को
 गन को गहिहै हो । हासभरी ब्रजवासिन की
 चहुँ ओर तेँ को सुनि कै दहिहै गो ॥ गोकुल-
 नाथ को संग करै तुमको पलप्रीति भरै चहिहै
 सो । चावचढ़ो चढ़ि चन्द कहा उनकी मुख
 को सम कै कहिहै को ॥ ८९ ॥

अपरञ्च ।

तन वैहरि ताप करैगी कितो सम तो बि-
रहानल की भरसैं । अरी बीज नचैगी तीनीच
कहा हम तोही सी मीच महा परसैं ॥ सुनि
गोकुल काम कठोर कहा सरि तोहरि हेरि
हिए तरसैं । सरसै घनघोर कहा मड़ि कै चख
तोसे बियोगिनि को बरसैं ॥ ८३ ॥

सोरठा ।

एरे जलद अयान, बड़े बूंद बरसै कहा ।
मेरे नैन समान, होन चहै छै है कहा ॥ ८४ ॥

चतुर्थ प्रतीप ।

भयो बर्न्य उपमान जो, ता लहि जो उपमान ।
भयो बर्न्य ताको कहत, मिथ्या चौथो जान ॥ ८५ ॥

यथा ।

पंकज पायन से कहियै कटि सी लखि
काम को छाम अँगूठी । रोमबली सी भुजंग
लली कुच सी छवि कोकनहूं की अनूठी ॥
गोकुल आनन सो ससि जो कहियै गहिये उ-

पमा यह जूठी । भावती की मुसुकानि सी एजू
अमी कहियै सो तो लागति भूठी ॥ ८६ ॥

सोरठा ।

तो मुख अमल अमंद, जाति भरो निसिदिन रहै
सरि करि करै पसंद, मुधा सधाकर को कुमति ॥

पंचम प्रतीप ।

भयो वर्न्य उपमान जो ताको करि सनमान ।
व्यर्थ करौ उपमान को भयो जो वर्न्य समान ॥

यथा ।

पग पानि साहे पंकज न पेखियत कहा
लङ्क लखे चारिहू के अङ्क की लसनि है । गो-
कुल कहत मुख सुखमा समूह सौं है कहा चंद्र
चंद्रिका बिलीकि बिहसनि है ॥ सौं है राम
अवली के नवली भुजंगौ कहा कुचन के आगे
कहा कोक की गसनि है । एरी भागभरी तेरे
भौंहन के सौं है कहा काम अभिराम के कमान
की कसनि है ॥ ८८ ॥

सोरठा ।

लखिलखि तो पगपानि ठकुराइन राते अमल ।
परै न ककु अनुमानि, ए कोरे किसलै कमल ॥

दोहा ।

या विधि पाँच प्रकार की कहै प्रतीप सुजान ।
होय बर्न्य आवर्न्य जहँ बर्न्य होइ उपमान॥१०१॥

रूपक लक्षण ।

बिसै कहत उपमेय की है बिसई उपमान ।
वाचक बिन ए जहँ मिलत तहँ रूपक सुखदान॥
क्रियारहित उपमान के लिए धर्म की अंस ।
मिलि अभेद तद्रूप तहँ रूपक कहत प्रसंस १०३
न्यून अधिक सम होत है तीनि तीनि ए दोय ।
या विधि सां षट भेद की रूपक कहियै जाय॥

यथा ।

दोस निसान परै पनकी पल पेखिवेही के
उकाह कए हैं । पान करै मुसुकानि अमीरस
काक कके आतसै रमए हैं ॥ गाकुल भूलि भरे
से ठरै ठिग भाग सोहाग के राग रए हैं । तो
मुख चंद चितै उनके चख चाव चढ़े ते चकोर
भए हैं ॥ १०५ ॥

कंचुकी स्याम घटा घन की बिजुरी जरी

कोर कहै मन मेरो । जूगुनू जाति जवा-
हिर के मुकुता वग के गन सों घन घेरो ॥ गो-
कुल रोमावली लतिका है मलै-जल सो लहरै
भरो नेरो । पीतम के चख चातक को तप क्यों
न हरै हिय पावस तेरो ॥ १०६ ॥

सोरठा ।

तो मुख संकर सेइ, कर कमलनि मर पै अमल।
मैन महादुख देइ, प्रिय को हिय अचरज यहै ॥

न्यून ।

कुंकुम राग परागभरी ककू स्यामताई म-
धुमत्त अली हो । राजति रोमावली बढि नाल
सो नाभि सरोवरनी तें चली जा ॥ गोकुल है
हरि पूजिबे जाग जगै जिन सो मुखदान बली
को । दंद हरै मकरंद बिना वृषभानलली कुच-
कौल-कली तो ॥ १०८ ॥

सोरठा ।

साहै बिना पराग, नैन नलिन तो अति अरस ।
भरे अधिकअनुराग, प्रियचख अलिको सुखसदन ॥

अधिक ।

चारु मुवास-भरो रस रास प्रकास मई
सुचि है रुचि घेरो । श्री को अवास धरे सुख
आस करें प्रिय के चखभौर बसेरो ॥ गोकुल
राग सोहाग सुनो लहि जोवन सूर सहायक
नेरो । फूलभरो निसि द्यौस रहै मनभावति जू
सुख पंकज तेरो ॥ ११० ॥

सोरठा ।

तो कचघन जस लेत, बड़े बड़े धरनोधरे ।
बिन मांगेही देत, जीवन प्रियचख चातिकहि ॥

तरूपक ।

जगत की जोति एक ठौर बिधि सिद्धि
करि मेरे जान तोको भली भाँतिन सँवारि कै ।
रूप गुन सरस सयान सुकुमारताई तोही मे
छुई है नौकी बिधि निरधारि कै ॥ गोकुल न
बाहिरे बगर के डगरि कहूं नजरि लगैगी री
बजरि नरनारि कै । दौरि दौरि देखन लगत
गाँव गोकुल के तो सुख-सुधानिधि सुधानिधि
बिचारि कै ॥ ११२ ॥

अपरञ्च ।

दक्षिण मे जिन्है देखि लक्षण मे देखियत
 लक्षण सो अक्षन मे स्वच्छनिरधारि कै । ते वै
 अनकूल भये आनद अतूल कए छोड़ि है नवेली
 मनमेली ते बिसारि कै ॥ गोकुल कहत रूप रंग
 रस बस महा कोह सों कए हैं भूली गति मति
 हारि कै । प्यारे के बसत चखचञ्चरीक आठो
 जाम तेरे मुखपंकज में पंकज विचारि कै ॥ ११३ ॥

सोरठा ।

तो कुच संकर जानि, संकर अति आनदभरो ।
 रोमवली फनि रानि, नाभि कूप सो कढ़ि चली ॥
 तो मुखससि ससि मानि, अरी बिंधुतुद भ्रमभरो ।
 दौरि गहैगो आनि, यातें दुरि पतिभौन भजि ॥

न्यूनतप ।

चञ्चल चलाक करकायल कबीले बड़े सु-
 खमा सों खीले खुले खेलत महानी के । रंगन
 सो भारे करतार के सँवारे सोहैं निरखत हारे
 जिन्है मैनहूँ की रानी के ॥ गोकुल पियारे के

हिया रे हरखित होत हेरतही ऐसे जग जन
सुखदानी के । और की परत आँखें ठरकि न
धोरे होत तेरे चख-मीन लखे मीन विन पानौ
के ॥ ११६ ॥

सोरठा ।

रूप सरित सरितान, कौन कहि तोको चतुर ।
नाभी भौर अमान, परि बूड़ै मन बारि विन ॥
अधिक ।

फूल सों भरी है चारु चारुता हरी है मुकु-
मारता खरी है करी कर तैं सँवारि कै । परन
सों पूरी मढ़ी परिमल खरी महा मण्डन महीं
की मैल होयै है बिचारि कै ॥ गोकुल गोपाल-
लाल देखी है परेखी महूं तुमहूं चली ही लली
पौर पै निहारि कै । वा दिन तैं उनको लगी है
मधुमता मन एरी कामलजा तू लतै है निर-
धारि कै ॥ ११८ ॥

सोरठा ।

सहस कहै मतिमन्द, तो मुख बारिज बारिजहि
फूल्यौ रहै अमंद यह निसदिन लहि मित्र लग ॥

विसद अभेद ।

सोहत है सुकुमार अरुन अमल आँके दे-
खतही जिनके अमोघ अव न रहै । मोद मक-
रंद भरे सौध सुखमाके जाके मिलत पराग के
मिलत चारो फर है ॥ गोकुल कहत है अनेक
कामना के दानि जोहत हीं मिटत उताप हर
वर है । श्रीपति के चरन सरोजन में बसो रहै
भूप चेतसिंह तेरो मन मधुकर है ॥१२०॥

परिनाम लक्षण ।

होत विषै विषई जहाँ क्रिया करन के हेत ।
क्रिया धर्म उपमेय को है परिनाम सचेत ॥१२१॥

यथा ।

कुछ भूपति को मरजी न मिलै अरजी सु-
कारी कितनौ भतियां । कवि गोकुल रावरे को
गुन रूप बिसूरत ज्यों परचै कृतियां ॥ निकु-
लाइ हिये सियराइ इतो कर-कांज लिखी पहुंचौ
प्रतियां । फिर बादि न चेत रहैं उचरैं तुव
आनन अंबुज को बतियां ॥ १२२ ॥

सीरठा ।

तो चख कांजन कोर, दौरि दौरि अंजनभरी ।

प्रिय चितवत बरजोर, हरैं लीत हरैं नये॥१२३

उल्लेखलक्षण ।

बहुविधि बर्नत बर्न्य की जहँ बहुजन सुखदान ।

नियतारथ को भ्रम नहीं तहँ उल्लेख मुजान॥१२४॥

यथा ।

बैटुज बिराट कहैं ठाठ महिमा को कहैं
देव-तरुवर दीन दानि बड़ि गय को । रघुकुल
भान कहैं परम मुजान देखि जगत को ईस बीस
विसे पुन्य पथ को ॥ गोकुल कहत मिथिला के
पुरवासी राम बाम अभिराम रूप भाखैं मनमथ
को । भूप भुवमंडल को कहत हैं दिगपाल बैरी
कहैं काल है तू लाल दसरथ को ॥ १२५ ॥

काम कहैं कामिनी कलपतरु कहैं दीन
भूप कहैं रूप है प्रचण्ड मारतण्ड को । साधु
कहैं सीलसिंधु बिंध कहैं बीर भिरे गुनी ते ग-
नेस कहैं मति की उमंड को ॥ गोकुल कहत

हौं लहत हौं पुरंदर सो चेतसिंह भूप भयो भू-
रतखंड को । बैरी कहैं काल साल कहैं खल
दल देखि हितुनु की माल कहैं लाल बरिबंड
को ॥ १२६ ॥

सोरठा ।


सौति कहैं हियसाल, लाल माल हिय की कहैं ।
सरमसौब गुरु बाल, कामलता अलिजन सबै ॥

द्वितीय उल्लेख लक्षण ।

एक करत जहँ बन्ध को बह भांतिन उल्लेख ।
नियतारथ को नियत करि पाइ सदस गुन भेख ॥

यथा ।

सखिन के सुमति मे उकति कल कोकिल
की गुरुजन हूँ के धुनि लाज की कथान की ।
फूलन अरुन चरनम्बुज पै गुंज पुंज चाव सी च-
ढ़ति चंचरीक चरचान की ॥ प्रीतम के स्रवन
समीपही जुगुति होति काम तंत्र मंत्र के बरन
गुनगान की । सौतिन के कानन में हालाहल
है हलति एरी मुखदानि तो बजन बिक्रवान की ॥



सोरठा ।

तू प्रिय के हिय बाल, सोनजुही की माल है ।
सौतिन के उर साल, तुही सिरोमनि बधुन की॥

स्मृति लक्षण ।

उपमा लखि उपमेय की स्मर्न स्मृति है सोय ।
बर्न्य लखे आवर्न्य की सुधि आण्हूँ हीय ॥१३१॥

यथा भवैया ।

वा दिन कालिंदी-कूल पै न्हात लख्यौ मुख
रावरे रूप अमंदहि । ता दिन तें कछु ऐसी
लसी है दमा जा बसी है गसे नंदनंदहि ॥ गो-
कुल भूल भरे से रहैं न चहैं खिन खेलन के
फरफंदहि । द्यौस में पंकज पेग्वो करैं सजनी
रजनी भरि देखत चंदहि ॥ १३२ ॥

सोरठा ।

वा दिन औचक आइ, लखि तो आनन हरि गए ।
ता दिन तें नित जाइ, हेरत कानन कांज के ॥

भ्रांति लक्षण ।

होत अतथ्यज्ञान जहँ रूप लखे सम जौन ।
भ्रम को बरनत भ्रान्ति सब अलंकारमति तौन॥

यथा सवैया।

तोहि सहाइ बिना मन में यहि काम दयो
कितनी दुख रोखे । गोकुल गौन कियो कित
को दूतनी चित तें हित की मन मोखे ॥ ऐसे
कहै बिरहाकुल राम कहा कहिये हिय मे भ्रम
पोखे । सोनजुही की लता लहि के हिय सों
गहि लावत हैं सिय धोखे ॥१३५॥

कवित्त ।

जानि मुखचंद चहुं ओर तें चकोर दौरै
चूसिबे को अभी चाहि चोचन पसारे ते । बो-
लि बरही के गन डगरि कगरि आवैं बारन बि
लोकि धोखे जल घनकारे के ॥ गोकुल समीर
संग फ़ैलत सुगंध जानि माधुरीलता है छोड़ि
कुंजन डरारे जे । कैसे कै बगर लौं डगरि आवैं
ए जू वह रगर परे हैं वे मधुप मतवारे ते ॥

सोरठा ।

री सखि मोहि बचाय, या मतवारे भ्रमर सों ।
डसो चहत मुख आय, भरमभरो बारिज गुनै ॥

सं ह लक्षण ।

बहुविधि बरनत वर्ण्य जहँ नियत न तथ्य अतथ्य।
अलंकार संदेह तहँ बरनत हैं मति-पथ्य ॥

यथा ।

भूपति भगीरथ की कीरति की गैल कैधौं
कैधौं सुरसरिता है जग-जन तारई । कैधौं सतो-
गुन की धसौ है धार धरनी पै कैधौं ध्रुव धरम
की परम कला नई ॥ गोकुल गोविंद के सरस
चरनांबुज तें कैधौं मकरंद को प्रवाह प्रगटावई ॥
फूली फरी हरी दूहूं और भूमिपाटी मध्य बसुधा
बधू की कैधौं मांग सुकुतामई ॥ १३६ ॥

कैधौं विधि कञ्चन-जरीब धरौ नापिबे को
देखि कै अपार है पसार पुन्य थर को । कैधौं
सेत सोने को रच्यौ है करतार जा पै पार गति
लित गन देवन को नर को ॥ गोकुल सुपथ मन-
मथ रथ को है कैधौं सतोगुन भू पै रस अदभुत
ठर को । भोर हरि सुरसरिता की ओर कैधौं
परो पारावार लों है प्रतिबिम्ब दिनकर को ॥

अपरच ।

महाराज चेतसिंह रावरी सभा में सोहैं
दीपन समेत कैधौं रोसनी के भार हैं । कैधौं
रितुराज मानि मेरे जान साहेब को फूले देव-
तरु कीन्हें प्रभा को पमार है ॥ गोकुल कहत
रिडि सिद्धि भई कैधौं खुले रावरे मुकृति पौधा
सोभा के अगार हैं । जानि छितिकन्त चढ़े बि-
मल बिमान कैधौं आये देखिबे को तुम्है धरा के
कुमार हैं ॥ १४१ ॥

सोरठा ।

यह केकी हरषाय, बोलि लखौ फिरि रोस कै ।
तौ कच समुझि न जाय, इहै मेघ अहिकुल किधौं॥

अपनुति लक्षण ।

मिथ्या की जै सत्त को सत्य सु मिथ्या होत ।
आपनुति षट भेद सो वरनत है कविगोत ॥

यथा ।

छै छिति की नभमण्डल लों ब्रहमण्ड है
चण्ड छटानि सों छावति । जानि परैगी घरी

पंल में कवि गोकुल हैं हम तोहि सुनावति ॥
चन्द को तू करि मन्द बिचार सखी अबहीं नहिं
तो तन तावति । आगि उठी बड़वानल तें बिन
घाम की पूरब तें चलि आवति ॥ १४४ ॥

चाहि चाहि उरज उतङ्ग ओज भावती को
कटि टूटिबे को मन मेरो री डरत है । याकी
कहा कहौं भई बकबात औरै कछू जानी ना
परति विधि कहाधौं करत है ॥ सौतिन को
मन बन तारि डारिहै गो कहै गोकुल खुलो है
कुम्भ नैननि परत है । बूड़ो हुतो आनँद सों
रूप के पयोनिधि मै देख सोई मदन मतङ्ग उभ-
रत है ॥ १४५ ॥

अपरंच ।

गौतम-नरिन्द चेतसिंह तप तेज तेरो भ-
गति को भाव सो सुन्यौ है जगदीस पै । ला-
लसा बढोहै चारु चारुता चढो है महामोद सों
मढो है मेरे जान बिसे बीस पै ॥ गोकुल न-
सनी को झार है रतनरयो चाहत असीस दयो

तोसि नृप द्वैस पै । आयो देखिवे को तुम्है न-
जरि को ल्यायो धरि सहसफना को फनि देखो
मनि सीस पै ॥ १४६ ॥

सोरठा :

यह ससि सखी न होय, बढति ताप याके लखें।
एक भई कटि सोय, विरहज्वाल चकचखन तें ॥

हेतु अपनुति लक्षण ।

मिथ्या को सत कीजिये कहु कारन जहँ पाइ।
हेतु अपनुति कहत हैं ताहि सकल कबिराइ ॥

यथा ।

बेनौ सों हमारी हारे पन्नग पिरारे भये जाइ
के पुकारे हैं बिसारे चित चाय को । गोकुल
कहत दाद चाहत दयो है हारि आपनी लछौ
है यातें कुटिल सुभाय को ॥ चन्द को बिचार
करि मन्द मेरी बौर कहु दौरि दुरी करौ बेगि
बारन उपाय को । सहसौफननि घेरे दसहु
दिसानि आवै बिष बरसावै सेस साहेब सहाय
को ॥ १४८ ॥

सोरठा ।

अरी पन्नगी पेखि, कुचगिरि-गह्वर तैं कढ़ी ।
रोमबली नहि लेखि, चढ़त मैर याके लखे ॥

भ्रान्तापन्हुति लक्षण ।

भ्रम सङ्गा मन और के कछु कारन लखि होय।
दूरि करै कहि सत्य सो भ्रान्तापन्हुति जोय ॥

यथा ।

नैन भरैं अंसुवानि ठरैं तन कंपत स्वास
बढ़ी निरसैहै । सुखि रह्यौ मुख पीरी परी अँग
खेदभरो सो छुये तपतैहै ॥ गोकुल छोड़ि भली
हों गर्दही लली अबहीं न गयो पल द्वै है । चैन
की कौन करै चरचा सुनि ऐसेही ग्वाल गँवार
जो गैहै ॥ १५२ ॥

सोरठा ।

दृगजल कँपत सरौर, भयो पीत मुख ज्वर कहा ।
एरी वहै अहौर, कछू बोलि द्रुत ह्वै गयो ॥ १५३ ॥

केकापन्हुति लक्षण ।

काहू के डर सों जहां कहै अतथ्य अरोपि ।
केकापन्हुति कहत तहँ तुरित तथ्य को गोपि ॥

यथा ।

साँवरो सलोनी गात पीतपट सोहत सो
 अंबुज से आनन पै परै छवि ठरको । मंत्र ऐसी
 जंत्र ऐसी तंत्र सी तरकि परै हँसनि चलनि
 चितवनि त्यों सुधर की ॥ गोकुल कहत बन-
 कुंजन को बासी लखे हाँसी सी करतु है री
 काम कलाधर की । दूतने मे बोलि और मिले
 हरि सुखदानी ? नाहीं मैं कहानी कही राम
 रघुवर की ॥ १५५ ॥

सोरठा ।

मोहिं मिलो छविजाल, चटक भरी अनुराग मै ।
 अरी लही तू लाल, मै न लयो महुँगो हुतो ॥

कैतवापन्हुति लक्षण ।

व्याज वचन लीन्हे जहाँ कहियतु मिथ्या बैन ।
 तहाँ कहत है कैतवापन्हुति जे मतिऐन ॥ १५७ ॥

यथा ।

कैसो उयो धरि सीरे सुभाय को चाय
 महा चित में भरि चोखे । संग सरोज सखानि

लये दये भेष बनाय नछत्रनि ओखे ॥ गोकुल
जानि कुमोदिनौ सी हमको ब्रजचन्द बिना
परिपोखे । पानिप प्राण पिण्ड सो लेत सखी
यह सूर सुधाधर धोखे ॥ १५८ ॥

सोरठा ।

बिनु पिय जानत वाम, समुझि पाछिले बैर को ।
फूलन के मिसि काम, सखि बानन सो लखु हनै ॥

पर्यस्तापन्हति लक्षण ।

नियत अर्थ को छोड़ि कै अनियत अर्थ अरोप ।
परजस्तापन्हति कहत अलङ्कार करि चोप ॥ १६० ॥

यथा ।

पूरित सु बास रसरास है प्रकासमई ज-
गत के जीवन को महामोद छाया ते । हरि के
सरस मन मधुप के बसिवे को बास को दण्ड
रहै भरे दौहदाया जे ॥ गोकुल कहत जे हैं
फूले से सर सरिता से तेन हैं कमल मन सरम
भुलाया हे । जन मन मानस मे फूलेई रहत
तेई कमल कलामई चरन महामाया के ॥ १६१ ॥

सोरठा ।

सुनि हरि होइ न वाम, अरी वाम तू बाभ है ।
जो प्रिय पै बिनु काम, वाम भई निसुदिन रहै ॥

उत्प्रेक्षा लक्षण ।

जह कहत सम्भावना सो सिगरे मतिधाम ।
वस्तु हेतु फल में लखे कविजन कहत ललाम ॥
आकृतफल कारन लहे और वस्तु की जह ।
होति जहाँ तहँ कहत हैं उत्प्रेक्षा कविजूह ॥
वस्तु हेतु फल होत है दोइ दोइ विस्तार ।
या विधि सो षटभेद की उत्प्रेक्षा निरधार ॥
उक्त अनुक्त बिसै कहै वस्तुत्प्रेक्षा आम ।
सिद्धि असिद्धि बिसै कहैं फल हेतो अभिराम ॥

यथा ।

फागु मची बरसाने मे आज लखी चलि
कौ जो ककू लखि जानौ । आलिन संग लली
वृषभान की लाल सखान लये सुखसानौ ॥
ऐसी गुलाल की धूँधर मै तिन्है गोकुलनाथ
बिलोकि बखानौ । साँवन साँभ की साँभ
सखी मिलि खेलत हैं चपला घन मानौ ॥१६७॥

आलस-भार भरे बिलसैं अंग गोकुल नै-
ननि नौंद भरी ल्यों । सोइ गई रति कन्त सों
कै थकि सो छवि आइ लखै न अरी क्यों ॥ रो-
मवली तिय की कुचबीच लसै श्रमवारि के
बुन्दभरी यौ । है कनकाचलसानु के मध्य सिं-
गार-लता मुकुतान फरी ज्यों ॥ १६८ ॥

अपरंच ।

जरी को बिछौना मसनंद जरदोजी, पैहे
अंबर जरी को बड़ी सुखमा की पूरमें । आनन्द
सों भरो तापै बैठो नृप चेतसिंह गोकुल कहत
जापै वरसत नूर हैं ॥ रतन को हुक्का सोहै पेच
नै अरुन कर आनन मिलत ऐसी देखि परै
मूरतैं । बाँधि कै मृनालन सों पंकज कलानिधि
को बस करि ल्यायो मन वरबस सूरपैं ॥ १६९ ॥

सोरठा ।

मुकुतन भरी लखै न, अरी माँग या तरुनि की ।
लहि ससिसासन सैन, नखतन की बेधैं तिमिर ॥

अनुक्तविषय वस्तुछे चा यथा ।

चमकै चपला भमकै जुगनू रट भेकी भ-
यानक लावत है । पिक भिल्लिन को गनमोरन
सों मिलि कै अति सोर सुनावत है ॥ कवि
गोकुल प्यारी बिना गिरधारी कहौ अब कौन
बचावत है । यहि ओर लखो छितिछोरहि तें
घन बोरत सों चलो आवत है ॥ १७१ ॥

सोरठा ।

यह पछिवाहो पौन, माहमाँस को सुन सखी ।
मनुहिमिगिरिकरिगौन, गिलेतुहिन आवत चल्थो ॥

हेतूछे चा सिद्धविषया यथा ।

पंकज से पानि पाय चन्द्रमा सो चारु मुख
खञ्जन से नैन बैन माधुरी सों भरो है । उरज
उतंग गङ्गधार सो लसत हार कम्बु ऐसी कण्ठ-
कल कोकिल सो गरो है ॥ नवली लता सौ
रोमअवली औ गोकुल है नाभि सरसिंधु सोहै
कापै जात तरी है । चारो जाम कामकला
सिद्ध करिबे को मानो याते विधि चार कैसो
अङ्क लङ्क करो है ॥ १७२ ॥

सोरठा ।

निसिदिन भरो सुवास, तो आनन अम्बुज मनौ ।
यातें अलिगन पाम, मुरस आस लागें लगे ॥

हेतूखेक्षा असिद्धविषया ।

बारि बीच बूढ़े खुड़े बारिज ते सूर सेवै
तेरे पानि पाइन की चारुता समक को । रोम-
अवली को देखि नवली लवंगलता धीरज न
धरति गहति यातें लग को ॥ गोकुल उरोज
अति उन्नतहि हारे देखि याही तें करे हैं
विधि सानुमान नग को । रावरे की माँग की
समान आंग पाइवे को यातें गङ्गधार देखो
धोवै हरि-पग को ॥ १७५ ॥

अपरञ्च ।

मानुस कोट पछी प्रसु आदि लता तरु
बारि समेत तयो है । चारिहु जाम यक्यौ बल
कौ पर गोकुल कोऊ कहूं न गयो है ॥ खीस
भरो सो मिल्यौ यहि को सजनी यह वाहू तें
ज्वालजयो है । जारिवे को निसि दोस मनो
ससि को सब सूर कलानि दयो है ॥ १७६ ॥

सोरठा ।

तू मनमय को बान, जानि पखौ दक्षिन पवन ।
तोहि करै पणिपान, मनु यातें हरहित करै ॥

फलोत्प्रेक्षा सिद्धविषया ।

आवति हौं गुन गौरि लखे तरुनापन सों
सब आंग भरे हैं । गोकुल काम कलाकलबीन
है नैन सों मैन के बान हरे हैं ॥ कञ्चनदाम
सो छाम चितै कटि पै चिवली बिधि बन्ध नरे
हैं । बोझ उरोजन को धरिबे को मनो बिधि
पीन नितम्ब करे हैं ॥ १७८ ॥

अपरंच ।

साँझहि तैं रचि सेज सखी सुखदानि सबै
रति सौज सँवारे । भूषन अङ्ग जराइन के सजि
अंजन आंजि कै नैन सुधारे ॥ गोकुल मोहन
सो मिलिबे को अहो मनभावति मंत्र विचारे ।
काम को जीतिबे को सब जाम मनो सब धाम
मे दीपक वारे ॥ १७९ ॥

सोरठा ।

नाभी बांबी थान, रोमवली तजि फनिबधू ।
उरज मलैगिरि सान, चढ़त मनो सौरभ चहै ॥

फलोपेक्षा असिद्धविषया ।

बारि में बूड़ि जपैं रवि को सरि पंकज पा-
दून की गहिवे को । बास उपास करैं बन में
कटि की सम सिंधिनि यौं चहिवे को ॥ गोकुल
श्रीफल संकर सेइ चहै कुच की रुचि को न-
हिवे को । रोज अन्हात है क्षीरधि में ससि तो
मुख की समता लहिवे को ॥ १८१ ॥

सोरठा ।

तो कटाक्ष अनुमानि, तुलिवे को मनमथ करै ।
अति अनियारे जानि, बान मालती मुकुल के ॥

अपन्हव लक्षण दोहा ।

मिलित अपन्हति सां जहाँ उत्प्रेक्षा है सु धाम ।
ताहि अपन्हव कहत हैं अलंकार अभिराम ॥

यथा ।

राजति चारुन रोमावली सो मनौ गिर तें

अलि-सेनि चली है । है रसरूप तरंग मनो
लखि गोकुल कौन कहै चिवली है ॥ रावरी
नाभि पै ये न लसैं बलि नील निचोल कौ नीवी
भली है । काम सरोवरनी मे मनो यह स्याम
सी सोहति कौल-कली है ॥ १८४ ॥

मो मत है नर नारिन को नख तें सिख लों
सुखमा सरसायो । मौरत देखि हितू बन बृन्द
लसै जस चन्द सखा कृवि कायो ॥ गोकुल ए
न है बौर के कूजे सो चेत महीप सुनो यों
सुहायो । मूरतिवन्त मनो रतिकन्त बिलोकि
बसन्त बिलोकन आयो ॥ १८५ ॥

कञ्चन सलोनी पिचकारिन की धार ऐन
चंचला जमाति की सरूप करखत है । भोडर
की चमकन जुगनू जमक जुवतीन की न कूकनी
कलापी हरखत है ॥ गोकुल गुलाल उड़ै लाल
भयो अंबर लों तहां चेतसिंह की सरूप परखत
है । सांवन की सांभ माभ मेघ मववा पै मनो
भागभरे भू पै अनुराग बरखत है ॥ १८६ ॥

सम्बन्धातिशयोक्ति लक्षण दोहा ।

अनहोनी जो बात है होति जहाँ सो आइ ।
सम्बन्धातिसयोक्ति सो तहाँ कहैं कबिराई॥१८७॥

अयोग्ययोग्य यथा ।

बासन बास कठौती हुती औ लटी दुपटी
जहि बीतत सीवत । गोकुलछानी सरगरी भीति
रहे जित चूहन के गन जीवत ॥ धाम सुदामै
लछौ हरि सों जहि देखियै देखि दिगम्पति
भीवत । बैठे जितै गन चातिक के घन तें वन
चोंच चलाइ कै पीवत ॥ १८८ ॥

सोरठा ।

रे पिय प्रान समान बसत हिये जानत सबै ।
अरी जरौ यह मान जानि परै यातैं जुदो॥१८९॥

योग्यअयोग्य यथा ।

नेरे न जाइ सकै सजनी लपटैं सी लगे
विरहागि बरे ते' । गोकुल कौन सन्देसो सुने
सुनि चेत कहा मन मोह भरे ते' ॥ आपन तौ
लिखि देत कहा यह बाँचि है कौन है जौन

जरे ते' । पाती उठै बरि ताती दूती हरि प्रान
पियारि के पानि परे ते' ॥ १८० ॥

सोरठा ।

री पिय की सनमान है करिबो तिय को उचित ।
हहा जरो यह मान जो न आदरै प्रानपति ॥

अत्यन्तातिशयोक्ति लक्षण ।

पर को पूरुब वरनियै पूरुब सो पर होय ।
अत्यन्तातिशयोक्ति सो वरनत हैं कवि लोय ॥

यथा सवैया

ककु दोस सुनाइ सरोस करी सजनी रस-
बाद सबाद भरे । चख चोट कै घूँघट ओट
कस्यौ बदले रुख त्योर तनेन करे ॥ कवि गो-
कुल प्रानपियारे की हरि हियो हरख्यो लगिबे
को गरे । टरि मान गयो पहिले तिय को पिय
को फिरि पाइन पानि परे ॥ १८३ ॥

सोरठा ।

पहिलेहीं हरि आइ, खरो भयो मो पैरि पै ।
पौछे दई पठाइ, मैं दूती जानत नहीं ॥ १८४ ॥

चपलातिशयोक्ति लक्षण ।

कारन के प्रारंभहौ जहँ कारज ह्वै जाय ।
तहँ चपलातिसयोक्ति सब बरनत हैं कविराय ॥
यथा ।

रूपभरी गुनरासि खरी करतार करी सी
अरी बिलसै तू । गोकुल तो सर सी तरुनी अब
लों न लखी बलि तो सरिहै तू ॥ तो मुखपङ्कज
के भये भौर रहै हरखे हित एतौ करै तू । पी-
तम को मन सौति को मान सुजान सो लूटि
ल्यो मिलतै तू ॥ १८६ ॥

मुख पीरी परी धरकी छतियां मन ते' कढ़ि
व्यौत गये कलके । तलबेली चढ़ी तन तापन
ते' बढ़ि स्वासन के उमड़े हलके ॥ कवि गोकुल
ऐसी इतै मैं भई यह जीवेगी क्यों बिकुरें पल-
के । रुख पीतम के चलिबे को चितै तिय के
चख री भाख से भलके ॥ १८७ ॥

सोरठा ।

प्रिय चलिबे को बैन सुनि चितको चुरि चाव गो।
अंसुवनि बरखत नैन लिखी लीक लौं लखि परै ॥

रूपकातिशयोक्ति लक्षण ।

विषई पद सों हीत जहँ विषै अर्थ को बोध ।
रूपकातिसयउक्ति तहँ बरनत कवि मतिसाध ॥
सवेया ।

बर वारिद की पटली मधि गंग त्रिकूल
सरोवरनौ में धसै । धनुसायक फूल तिलो की
जपादल दाड़िम बीच सुधा बरसै ॥ कवि गो-
कुल कांबु चको चकई अलिसेनी सिरौस कली
लों लसै । इतनेवर भार भरी कदली भर सों
लखि कौलनि कैसो बसै ॥ २०० ॥

इन्दुबधूगन पङ्कज पै कदली पर केहरि की
काटि जानी । तापर काम सरोवरनौ मनि कां-
चन सेनि बिलोकि बखानौ ॥ तापर गोकुलनाथ
सिंगारलता पर है अचरज्ज महानौ । धार धरे
घिरि घेरि रहे घन भूधर कांबु कलाधर मानौ ॥
सोरठा ।

है पंकज पै पेखि कनकलता फूली फरी ।
अरि बलि तापै देखि मीन लये ससिघनगसो ॥

भेदकातिशयोक्ति लक्षण ।

औरै औरै बरनियै बर्न्य व्यवस्था रूप ।

भेदकातिसयउक्ति सो बरनत हैं कवि भूप ॥ २०३ ॥

यथा सवेया ।

देखति हौं दिन द्वैक ते औरई ठान ठनी
ठकुराइन केरी । बैठिबे की उठिबे हंसिबे की
सो औरई भाँति की बानि बयेरी ॥ गोकुल बू-
झति हौं कहियै डरि डौरि उठी लखि रावरे
केरी । औरई चाल चितौनि है औरई औरै भई
बलि बोलनि तेरी ॥ २०४ ॥

अक्रमातिशयोक्ति लक्षण ।

कारन औ कारज जहां होत एकही संग ।

अक्रमातिसैयोक्ति सो बरनत सुकवि सुदंग ॥

यथा ।

रूपभरी गुनरासि अरौ विधि ऐसी करी
सिधि तोहि सुजानहिं । तो सरसी तरुनी जग
में धरनी पै कहां बरनी लखि आनहिं ॥ गोकुल
गौने के बासरहीं यह दंग हौ कौन के अंग ब-

खानहिँ । एकहि संग समेटि लयो बलि पौतम
को मन सौति के मानहिँ ॥ २०६ ॥

सोरठा ।

लावत सांवरो अंग बानट को अटकन लगी ।
अरि अलि लागे संग चखाचित अंक कलंक को॥

तुल्ययोगिता लक्षण ।

बर्न्य बर्न्य को धर्म इक कै अबर्न्य को होय ।
तुल्यजोगिता दुहुन मधि क्रिया एकही हाय ॥

यथा ।

आनँद देत चकोरन कों बिकसैं कुमुदौ सु-
हरै तम तोक को । जीवन को तनताप हरै
करि सींचि प्रियूखमई करै लोक को ॥ गोकुल
रावरेही में लखे तैं कहां लगि लों बरनै गुन
थोक को । एरे सुधानिधि तेरे उए दुख होत
वियोगिन कौलनि कोक को ॥ २०६ ॥

सोरठा ।

उयें तेजनिधि भान तपित होत सिंगरो जगत।
पावत मोद महान कोक सोक तजि कोकनद॥

अवर्ण्य को एक धर्म ।

रूप की खानि सुजानभरी गुन गाढ़वे जोग
बिरंचि बनाई । तो सरसी तरुनी जग में बर-
नीयै विलोकि कहा सुघराई ॥ गोकुल मोहन
को मन मोहन क्यों न करै सुनियै सुखदाई ।
तो पग पानि चितौत लखी किसलै अस कांज
की काठिनताई ॥ २११ ॥

सोरठा ।

तो कुचरुचि को देखि हानि मानि हारे हिये ।
जड़ ह्वै गए विसेखि सानुमानु अरु श्रीफलौ ॥

अपर तुल्ययोगिता लक्षण ।

हित में अनहित में जहां एकै कहिये धर्म ।
तुल्यजोगिता अपर यह कहत सुकवि तजि भर्म ॥

यथा ।

तो सरसी तरुनी जग में न रची बिधनै यह
जानि लई है । क्यों न बसै बस रावरे के उन-
में इतनी बलि चातुरई है ॥ गोकुल रावरे के
गुन रूप सराहि सकै अस को नवई है । मो

कर जो पठई तुम कों यह सौतिनही को दु-
साल दर्द है ॥ २१४ ॥

सोरठा ।

रे तिय परम सुजान जानि हिये अति मोदभरु
दियेरहत नित मान सौतिन को अरु अपुन को
तुम सम और मही न, चेतसिंह सुनिये नृपति ।
हार बास कै दौन, तुम सत्रुन कों मित्र को ॥
दानी मूरन तो सरिस, लख्यौ चेत कितिपाल ।
दौनन को अरु दुवन को, देत तुही लखि माल ॥

अन्यतुल्ययोगिता लक्षण ।

लहि गुन को उतकर्ष जहँ सम करि कहिये बैन ।
तुल्य जोगिता अन्य यह बरनत कवि गहि चैन ॥

यथा ।

कानन लौं चरिबोर्ड करैं अति प्यारे लगैं
कजरारे अहो हैं । जोवन के मद सों उमगे
लखि मेरे मढ़ै जन जिनत को हैं ॥ गोकुल साँच
सराहिवे जोग जगै जग में जग जैनत जो हैं ।
चञ्चल खञ्जन मीन मृगै न सुचैन भरे चख रावरे
सोहैं ॥ २१६ ॥

सोरठा ।

तो कुच श्रीफल सान, करी कुंभ करि हित हिये।
धरि विधि अधिक सयान, अति कठोर उन्नत करे॥

दीपक लक्षण ।

जहां बर्न्य आबर्न्य को कहिये एकै धर्म ।
एक क्रिया दुहुं दिसि तहां दीपक दीपक पर्म ॥

यथा ।

एक घरी न थिरै फिरतै रहै कानन लों
भरि भूरि प्रभा तें । जीवन भार भरे असितौ
सित सोहत एऊ अहो कजरा तें ॥ गोकुल दोऊ
सराहिबे जोग जगै जग में जम मोद महा तें ।
रावरे नैन कटाक्षन तें बलि खञ्जन राजत च-
ञ्चलता तें ॥ २२२ ॥

सोरठा ।

धारे धुरवा बारि, तो कच सरस सनेह सों ।
चकिचख रहत निहारि, सोभित होत धराधरे॥

दोहा ।

दीपक सोहै तीनि विधि अर्थावृत्तयक मानि ।
और पदार्थावृत्तयक पदावृत्तयक जानि ॥२२४॥

अर्थ एक पद दोइ में जहां मुआवृत्त लेत ।
 अर्थावृत्त दीपक तहां कहत सुकवि करि हेत ॥
 अर्थ दोइ पद एक की आवृत्त करिये जौन ।
 पदावृत्त दीपक तहां बरनत हैं कवि तौन ॥
 पद औ अर्थहु की जहां आवृत्त होइ अमन्द ।
 कहत पदार्थावृत्त तहँ सुकवि महा तजि दन्द ॥

पदावृत्त यथा ।

प्रेम करौ पहिलै करिकै नजरौ न मिलै
 यत जैयत भागे । जानि परे तुम जैसे ही तैसे
 लखि चख रावरे के अनुरागे ॥ गोकुलनाथ ति-
 हारो न दोस है आपनोई कृत आवत आगे ।
 पै गुन आपुनहूँ की सुनो सिगरे जन गाँवन
 गाँवन लागे ॥ २२८ ॥

अपरंच ।

जख गई कब की कटि कै रहरौ न बढी
 न भयो सन रुड़ो । गोकुल नारे नदी तट के
 भरि भे जित पैयत आनन्द जूड़ो ॥ मोहन सों
 मिलिहै न भये कत सोच करै चित को निति

खूड़ो । ताप चढ़ी तिय के तन में लखि कै सि-
गरो बन सो बन बूड़ो ॥ २२६ ॥

सोरठा ।

गहे सुगुन गुनखानि, यह मालिनि मनमथ भरी।
भरो सुरस पहिचानि, संग सुमन सुमनो गुहै॥

अर्थात्त यथा ।

दोस करौ अपसोस इहै तुम कैयक बेरन
सौहन कीन्हो । प्रेम को नेम निबाहिवो जो सो
भली बिधि सां सिधि कै निधि लीन्हो ॥ हैं न
कृपे गुन रावरे के यह सोनै कही बकि जो उन
दीन्हो । गोकुल जैसे हौ तैसे चलौ परसौ पग
जो हित चाहत चीन्हो ॥ २२१ ॥

दम्पति रमत रति रङ्ग मै उमङ्ग भरे तूहूं
दुरी देखी बनी वानक मुजान की । जैसे घन
दामिनि जुरत ल्यों लला के हिये लोभ भरी
लाड़िली अधर मधुपान की ॥ गोकुल कहत
यहरात तन भावती को ही मैं ठहराति है न
माल मुकुतान की । नाहीं भरी अनक बनक

मुनु सीबी भटू घुघुरू की घनक भनक बिकु-
वान की ॥ २३२ ॥

पदार्थावृत्त यथा ।

भूपन को मान गयो ग्यान गयो वीरन को
वैरिन को प्रान गयो खलदल खरको । जनक
को सोच गयो सङ्कट सिया को पुरजन मन पन
भयो आनंद सु भर को ॥ गोकुल कहत साधु
सुखमा सरस भई भयो है असाधुन को रूप
जरो जर को । मङ्गल उदोत भयो पोत पुन्य
पानिप को दोइ खण्ड होत हीं कीदण्ड महा
हर को ॥ २३३ ॥

अपरंच ।

सब राति जगी रति रङ्ग में अंगन आलस
के गन गाजि रहे । कच छूटि छये गिरि हार
गये उर पै नख के छत छाजि रहे ॥ कवि गो-
कुल लङ्क लटी लखि लोयन लालची मोहि सो
बाजि रहे । सखि लाजि रहै चखचारु चितै
मुख पै अम सीकर राजि रहे ॥ २३४ ॥

सोरठा ।

चख बढि लागे कान, कच बढि लागे पांव सों।
चित बढि लग्योस्यन, हित बढि लाग्यो स्याभसों॥

प्रति वस्तु उपमा लक्षण ।

वाक्य एक सामान की जहां कहत कवि लोय।
प्रती वस्तु उपमा तहां कहत क्रिया है दोय ॥

यथा ।

बालक बैस तें या ब्रज मै बसि रूपवतीन
में दै फिरी फेरी । चातुर हौ बतियां समुझी
गुन रूप की रीभन जोग घनेरी ॥ गोकुल तो
सरसी तरुनी न लखी अबलों ठकुराडनि मेरी।
राजै सुधा सो सुधानिधियों मुसुकानि सों सो-
हत तो मुख एरी ॥ २३७ ॥

सोरठा ।

लसत तेज तें भान, दिनमनि बारिज बंधु वर।
धरे सुधा सुखदान, सोहत मसि बसकरि कुमुद ॥

दृष्टान्त लक्षण ।

जहां बिम्बप्रतिबिम्ब सो बरनन करियै आनि ।
अलङ्कार दृष्टान्त तहँ कविजन कहत बखानि ॥

यथा ।

ठाकुर हौ तिहुंलोकन के अरु मैंहूँ भिखा-
 रिन को अधिपैहैं । आपुन हौ नवनिधि धनी
 रचि मैं रस सो बसु बृन्द लखैहैं ॥ रावरे के
 जस को चसको सुनौ गोकुल हौं कवि कीरति
 गैहौं । श्रीदशरथ को रामलला तुम दाता बड़े
 बड़ो भिकुक मै हौं ॥ २४० ॥

सोरठा ।

तोमुख कवि की खानि भरो जोति जगमग करै ।
 यहौ कलानिधि जानि सुधासिंधु कीरधितनै ॥

अपरञ्च ।

गाइवे जोग जगै जग माह धनी दूतनी
 सुकुमारतई है । चाहतहों रहिये दूनको जू
 दूती चख नें चलि चाह कूई है ॥ गोकुल जो
 बिधि ऐसे रचै तव तौ धरनी पर धन्य हई है ।
 चारु सुबास सनो सरसीरुह रावरे को मुख रूप
 मई है ॥ २४२ ॥

निदर्शना लक्षण ।

वाक्य जो ताकि अर्थ को सटस एक आरोप ।
 तहां कहत निदर्शना सुकवि कहे चित चीप ॥

यथा ।

मोहन मंत्र जो तंत्र बसीकर जोति जगे
टटका के दिया की । टोने की टामन की बिरतौ
मनि जौन मनौभव से करिया की ॥ गोकुल
ठौर ठगौरी की बौरई काम कला चित चोर
पिया की । औरन जानि हिया में अहे यह जो
सब सो मुसुकानि तिया की ॥ २४४ ॥

लेप मनोघनसार को अंगन लाडू दे धार
गुलाब जलै की । छाडू उसीर न्दवाडू पियूष सीं
आगि बुझाडू दे अंग अलै की ॥ गोकुल पाडू
परौं चलि बेगि दसा कहि जात न है बिकलै
की । औधि सुनाडू दे लाल की ऐवे की प्याडू
देवालहि बाय मलै की ॥ २४५ ॥

सोरठा ।

जख मझख पियूष, इनको जौन मिठास है ।
सो जानति पिय भूख, तौ अधरन की मधुरता ॥

अन्यनिदर्शना लक्षण ।

जहां सु चारु पदार्थ की एक वृत्ति है स्वच्छ ।
तहां सु अन्यनिदर्शना बरनत हैं मति दृच्छ ॥

यथा ।

बारन भौर के हारन की रुचि खञ्जन की
चख चाहि हरे हैं । आनन चारु सुधानिधि की
कुच कोकन की सुचि ओप अरे हैं ॥ गोकुल
रोमवली लतिका अवलोकि उरु कदली निदरे
हैं । पङ्कज की सुकुमारतई तुव प्रानप्रिया पग
पानि धरे हैं ॥ २४८ ॥

सोरठा ।

बलि तो आनन चन्द, जीते उाजन गिरिवरो ।
तो पगपानि अमन्द, देत हरेये सरसिजहि ॥

अपर निदर्शना लक्षण ।

अर्थ असद सद को जहां होत क्रिया सों बोध ।
तहां सुअपरनिदर्शना सुकवि कहत मति सोध ॥

सद अर्थ बोध यथा ।

अति जीवन भार भरे उभरे सुधरे सुखमा
सुख मैं लहिये । घन पीन प्रवीन अडोल अली
जिनकी थिति की मिति को चाहिये ॥ मधि
गोकुल हार विहारन देत उरोज अही यह सो

कहिवे । हित नीति जनावत मीतन मों बिन
अन्तरही मिलि कै रहिये ॥ २५१ ॥

सोरठा ।

धरि कुच भर क्रस लङ्क, यहै जनावति जगत को।
धोर धरे तें रङ्क, लखौ उठावत गुर भरौ ॥ २५२ ॥

असद अर्थ ।

अति ढीली करौ गतिया इनकी चख में
लखि चञ्चलता सिलई । कटि छीन करौ करि
पीन नितम्ब उरोजन की लघुता बिलई ॥ कवि
गोकुल खीनहि पीन करे अँग पीनहि खीनता
जोहि लई । तरुनापन जो दिन द्वैक बड़े तिन
को सिखवै यह आसि लई ॥ २५३ ॥

सोरठा ।

कच घुघुरारे जोय, यहै जनावत दुरजनहि ।
नितह्म बम्भन हाइ, तऊन तजिये कुटिलता ॥ २५४ ॥

व्यतिरेक लक्षण

उपमा तें उपमेय में अधिक कही गुन जोय ।
व्यतिरेकालङ्कार लखि प्रीति घनेरी होय ॥ २५५ ॥

यथा ।

हैं परसे बर चारु दृगञ्चल रञ्जत सी सुखमा
 कजरार्द्र । नेकु नहीं थिर हैं फ़िरते रहैं कानन
 को परसैं सुखदार्द्र ॥ गोकुल खञ्जन तें डून तें
 दूतनी ये लखी हरि अन्तरतार्द्र । वेधत हैं ल-
 खते हियरो तिय के चख में दूतनी अधिकार्द्र ॥

सोरठा ।

तो रोमावलि रूप, अरी पन्नगी को धरे ।
 है गुन भरी अनूप, डसति डीठि नीठिहु परे ॥

अपरञ्च ।

आतप प्रताप बसुधा में भरैं करैं सुखी
 हितू सरसिज जे बढै हैं प्रेम तोय में । जारैं
 अघतम मारै बैरी हिमवर जोर चारै वेद प्रथ
 निति गर्थे एहि खोय में ॥ गोकुल कहत भारे
 गुनन सँवारे बिधि परम प्रभा में पूरे पुन्य के
 समोय में । कैसे मारतण्ड सकै कहैं बरिवण्ड
 जाकै सहसौ करन की सकति कर दीय में ॥

सहोक्ति लक्षण ।

सङ्ग भाव जहँ कहत हैं मनरञ्जन कवि लोग ।
तहँ सहोक्ति बरनत चतुर हरिहर कैसी जोग ॥

यथा ।

भरी रूपरास धरे परिमल पास तू है क्यों
न करै कमल कलानिधि सों कसरो । भौरन
चकोरन सों मोरन सों एभी कहूँ पावतीहौ ब-
गर डगर लों अवसरो ॥ गोकुल गर्दही आज
कातिकी को न्हान नीर सबहीं न सँधि कछौ
मालती सों मसरो । सहज सुवास तेरे अंगनि
को एरी बीर कोसन लों गयो साथ कालिन्दी
के पसरो ॥ २६० ॥

घोरठा ।

चलि दुरि तुरत अवास, छोड़ि कुञ्ज फूले बिप्रिनि।
तो संग सुतन सुवास, भौर भीर आवत चली॥

विनोक्ति लक्षण ।

कछू वस्तु विन बरनिये बर्नीय जहँ हीन ।
अलङ्कार सुविनोक्ति सो बरनत सुकवि प्रवीन॥

यथा ।

राति जगी प्रिय के संग में थिर ह्वै सी रही
 मनो नीर सों न्हाये । रङ्ग पगी उमगी सुख सों
 भूपकी पलकैं सुखमा सरसाये ॥ गोकुल हीं
 बलि जाति बिलोकि गर्व बलि यों कहिये सिर
 नाये । खञ्जन सी न रहीं अँखिया मनरञ्जन
 अञ्जन के बहि आयै ॥ २६३ ॥

सोरठा ।

मन्द मधुर सुर लीन, अरी वाँसुगी तू बजै ।
 सतसङ्गति बिन हीन, भई लगौ मुख गोप के॥

दुतीय विनोक्ति लक्षण

बर्ननीय वरनत जहां ककू वस्तु विन रम्य ।
 दूजो कहैं विनोक्ति सब अलङ्कार बुधि गम्य ॥

यथा ।

नैहर में प्रिय के मिलिवे को उतारि गई
 सकुचानि धिरे तें । गोकुलनाथ दयी हठि जा-
 वक सो पसखी अम खेद तिरे तें ॥ भोरहिं
 आइ लख्यौ सजनीन कियो परिहांस अनन्द

थिरे तें । कैसी लसैं अरुनै अंगुरी बलि रावरे
की बिकुवानि गिरे तें ॥ २६६ ॥

सोरठा ।

बिनु कठोरता अम्ब, लसत रावरे के चरन ।
सब जग के अवलम्ब, बसत साधुजन के हिये ॥

समाशोक्ति लक्षण ।

प्रस्तुत सों अस्फूर्ति जहँ अप्रस्तुत की होति ।
समाशोक्ति ज्यों दीप तें मिजत दीप को जोति ॥

यथा ।

जीवन के दानि हौ सुजान हौ सरस अति
जगत के जीवन को आनँद उमाहे हौ । सुजस
को पाओ परस्वारथ को धाओ धरा तपनि मि-
टाइवे को मत अवगाहे हौ ॥ गोकुल कहत इन्हें
आस रावरे की है जू प्यास इनकी न मेटि देत
कहौ काहे हौ । गरजि घुमरि घनश्याम क्यों
बरावत हौ कछू चातकीनहू को अपराध चाहे
हौ ॥ २६८ ॥

सोरठा ।

खतानवल तनु अंग, जाति जरी जीवन बिना ।
कहासिख्यौयहठङ्ग, तरुनअरुननिरदैरिखि ॥

परिकर लक्षण ।

अभिप्राय जहँ क्रिया की सुबिसेखन में होत ।
अलङ्कार परिकर तहां बरनत हैं कवि गोत ॥

यथा ।

करकत रहैं धार ठरकति आंसुन की हर-
कत लाज तन तपनि पसारे हैं । पल न परन
देत कल कल पावत हैं जानै न जतन जन जी
में निरधारे हैं ॥ ह्वै को निरदै री उन्हें ऐसे न
चितै री बीर गोकुल के नाथ वे तौ रावरे पि-
यारे हैं । ईछन में गड़ैं क्यों न री छन बिलो-
कतहीं तीछन कटाक्ष बरे ईछन तिहारे हैं ॥

अपरध्व ।

आवतही जमुना तट तें हरि तोहि मिलौ
ठकुराइन मेरी । ता छिन तें करसायल लीं
घुमरै न परै पल को कल एरी ॥ गोकुलनाथ

सुखस्वर साधि रच्यौ यहि में बनि मै न अहेरी ।
घायल क्यों न करै करि हायल पाइ परौ बलि
पायल तेरी ॥ २७३ ॥

सोरठा ।

क्यों न लङ्क लचि जाइ, पीन पयोधर भर भरी ।
यातें कहियत हाइ, ऐसे रुचियत औ चका ॥ २७४ ॥

परिकरांकुर लक्षण ।

अभिप्राय जहँ क्रिया की है विशेय पद बीच ।
परिकरअंकुर कहत तहँ जे हैं सुकवि निभीच ॥
यथा ।

रुसनहारी लखी कितनो पर या विधि सों
तन काहू न तायो । पानि औ पान बिसारि हहा
तुम ऐसी भई सब द्यौस गवायो ॥ गोकुलताप
हरै गो लखे अबहूँ तो चहौ पग बाहिरे नायो ।
पाय परौ गिरौ बीर बलाय ल्यों वाम सुधाधर
धाम पै आयो ॥ २७६ ॥

सोरठा ।

क्यों न मधुव्रत होइ अविवेकी या जगत में ।
निसिकमलनमें सोइ फिरत आक टाकन लखी ॥

श्लेष लक्षण ।

अलंकार अश्लेष तहँ वरनत हैं मुखधाम ।
जहां अर्थ है तीनो को संग होत अभिराम ॥
बर्न्यबर्न्य को श्लेष यक औ अबर्न्य को एक ।
बर्न्य अबर्न्यहु को कहत कविजनसहितबिवेक ॥

बर्न्यश्लेष—यथा ।

ठरै मधु माधुरी पराग सुवन सनी सरस
सलोनी पाय तापन के अन्त की । कामना जु-
गति की उकुति सरसावत सी थावै मधुराई
कलकीकिल के भन्त की ॥ गोकुल कहत भरी
गुनन गँभीर सीरी कानन लों आवति पियूख
ऐसे वन्त की । ऐसी सुखदानी हौ न जानी ज-
गती में और कविन की बानी बर बैहर बसन्त
की ॥ २८० ॥

सोरठा ।

तो तन सुख को रंग चटक भरो नीको लगे ।
गहिरो गहे उमंग लग्यो लाल सोधि पग्यो ॥

अबर्न्यश्लेष—यथा ।

आजु कौन तोसी बारबधू भूमि मण्डल

में भाग सो भरी है गुन रूप जुगतन की । विधि
की गढ़ी है तू पढ़ी है प्रेम नेम करि काम मंत्र
तंत्र की रिचा सो सुकतन को ॥ गोकुल बि-
लोकि बार बार बलि जाति बलि ऐसी कथा
भाल में लिखी है सुकतन की । रावरे को मांग
को निहारि आंग एजू सुनौ वारि वारिजाति
जो मैं माल सुकतन को ॥ २८२ ॥

सीरठा ।

री कुच तेरे बाल भरे अप्रसूव पुन्य सों ।
लखि सुकतन की माल धन्य होन चाहत भजै॥

वर्ण्यवर्ण्यज्ञेष यथा ।

फूल सों भरी है हरी हिरत हियो हरति
घनी सुख मनी सपनी है रति कन्त की । सरस
सुवासरली अलि अवलीन मिली बिरती बनी
सी वर बसोकर मन्त की ॥ गोकुल विचित्र अंग
रंगन सों रई राजै नई सुखमा सी भूरि भूतल
अनन्त की । आपुन बिहारी हौ बिहार करि
देखौ बनी बौस बिसे प्यारी फुलवारी है बसन्त
को ॥ २८४ ॥

सोरठा ।

तो चख लखिली वाम सपरसितों मुख लाज ते
अति आतुर तन स्याम करे दुरे अरिबुन्द मे ॥

अप्रस्तुतप्रसंसा लचन ।

अप्रस्तुत सो होति है जहँ प्रस्तुत की जह ।
अप्रस्तुत परसंस कह ताको सुकवि समूह ॥२८६॥

यथा ।

नेकु कुटै जुटै दौरि के तीन अगौति बि-
योग को एक सला है । मोद भरी घनस्याम के
ही मैं बसै सब जाम भई अचला है ॥ गोकुल-
नाथ सराहिवे जाग करे यहि को प्रन प्रेम भला
है । जानि परै जगती तल बीच संजोगिनि एक
अरी चपला है ॥

अपरंच ।

तोहि बिना जल रासिन ते' ददुरागन मो-
रन को सुख पावै । थावर जंगम जो जग में
सब फूलै फरै मुद मंगल गावै ॥ गोकुल तोहि
जप्यो इतनै दिन मौसर औसर तू न गँवावै ।

बारिद एतो विवेक विचारिबी चातिक तोहिँ
अकेलोई ध्यावै ॥ २८८ ॥

सोरठा ।

यह जग धन्य चकोर, संकल द्यौस आनंद तजै ।
ससि लखि लखै न और, घनउड़गनग्रहगनउचै ॥

प्रस्तुतांकुर लक्षण ।

प्रस्तुत ते' द्यौतन जहाँ प्रस्तुतही को होत ।
प्रस्तुतअंकुर कहत तहँ अलंकार कबिगोत ॥

यथा ।

सारस सरंस हंस वंसन सों सोहति है पा-
निप के पूर पेखि परसि सुधासे तू । लहरनि
लेति छहरनि सुखमा की क्यों न बारिजन हेरि
हियो हरषि हुलासे तू ॥ गोकुल कहत ऐसी ग-
हत अयान एरे एतिक सयान मानि ज्ञानगन
नासे तू । परम पुनीत ऐसी छोड़ि सरिता को
सोवै खलप सरोवरनि पथिक प्रियासे तू ॥ २८९ ॥

सोरठा ।

अलि कदंबतरु पाइ, सुमनभरो मकरंदमै ।
तजि करील पै जाइ, निरस अपत परसे कहा ॥

पर्यायोक्ति लक्षण ।

जहाँ कहे पर जाय के बोध अर्थ निज होत ।
परयायोक्ति तहाँ कहै अलंकार कविगोत ॥
यथा ।

ताड़का सँघारि मारि सबल सुबाहु-सैन
जग्य करवायो रिखिराय जू सो नेत में । तारी
ऋषिनारी व्याही जनककुमारी भारी तोरि कै
पिनाक धाक बीरन के चेत में ॥ गोकुल तू
ताहि भज खलसर खंडन कै बलि बांधि राखे
मम सुगरौव हित में । बांधि सेत समुद्र में सीस
दस सीस भुजा रावन के काटे जिन सोहैं रन-
खेत में ॥ २६४ ॥

सोरठा ।

करीकुंभ गिरिसानु जिन जीते श्रीफल कठिन ।
ते नर निपट अजान तिन्हें छोड़ि औरहि भजें ॥

द्वितीय पर्याय लक्षण ।

छल बल करि कै होत है जहाँ सुसाधन द्रष्ट ।
परजायोक्ति दूहौ कहत जे है मति-उपबिष्ट ॥

यथा ।

घाट घनो जमुनातट को नरनारिन की
जित भीर मभैस्यै । गोकुल हार बड़े गथ को मुकु-
तान को ऐसे अहो बिसरैस्यै ॥ पायो है मै कहि
ते पठ ओ सो बिना जन जानि तजौ दुचितैये ।
लीजिये जू पहिरौ अभिराम हौ काम बने चलि
धाम में ऐये ॥ २६७ ॥

सोरठा ।

अहो पथिक भइसांभ, तटसूनो निरजन सघन ।
डरि सरिहौं पथमांभ, रहिघट भरि होंहूं चलीं ॥

व्याजोक्ति लक्षण ।

निन्दा तै अस्तुति जहाँ निकसति सुनो निमीच ।
अलंकार व्याजोक्ति जहँ निन्दा अस्तुति बीच ॥

यथा ।

देवन को दुज दीनन को जिन पाय पयो-
धि को पूर पसारौ । बालक वैसहि तें बल कै
जिन सज्जनपीड़न को प्रण धारौ ॥ गोकुल जंग
जुरे तुरतै जिन दैतन के गन को बन जारौ ।

देत तिन्हें सुर के पुर को यह कौन सो काम
है राम तिहारौ ॥ ३०० ॥

सीरठा ।

गर गरधर सिरमाल रचि अरचत जेतो सलिल ।
सरस सुमन को माल तिनै देति तू सुरसरित ॥

स्तुति व्याज निंदा यथा ।

कहत हौ सांची तुम सांची हौ हूं जानति
हौं बतियां तिहारौ सब सांची अनुमानौ मैं ।
कबहूँ करीगे अपराध साधु साहेब हौ साधुन
की संगति की इंगित सो मानौ मैं ॥ गोकुल के
नाथ आए भोरही सनाथ करी रावरे को गुन-
गन कीन्हों भलेगानो मैं ॥ इतनी भलाई क्यों
न चाहत चलार्द्ध तुम भैया हलधर के हौ दैया
तुम्है जानो मैं ॥ ३०२ ॥

सीरठा ।

क्यों न सिरावै हीय अहो पीय पावन परम ।
सकलकलाकमनीय भले परे ससि से परखि ॥

निंदा आज निन्दा लक्षण यथा ।

कारो तन, कारो मुख, कुटिल कठोर क्रूर
क्यों न करि देत विधि ऐसे महापापी को ।
कूवत न कोऊ नेकु बैठन न देत नीरे काठ लों
कठोर घोर आखर अलापी को ॥ गोकुल कहत
वाहि वैसेही जगत निन्दै करिबे न जोग इतनो
हो मदिरापी को । पतित कहावै क्यों न पक्षी
में काग जो पै पालत है तोसो पिक अपत
उतापी को ॥ ३०४ ॥

खोरठा ।

हर को अरि बिन अंग काम सचु बिरहीन को।
करि दोषाकर संग तोसों अति निंदित भयो ॥

आक्षेप लक्षण ।

आपु कहै कहिको करै आपु निषेध विचार ।
आक्षेपालंकर सो बरनत कवि निरधार ॥३०६॥

यथा ।

आवत हैं इत दोसभरे इनके सब औगुन
तू कहिअरे । बैठिअै दूरिही अैठिअै भौंहनि

मान कै मौन महा गहिअै रे ॥ गोकुल पाइन
 पारिअै हेरि कै फेरि कह्यौ न दूतो नहिये रे ।
 जैसौ करै प्रिय तैसौ करै मन नीको रहैउव
 दूतो चहिअै रे ॥ ३०७ ॥

सोरठा ।

हे मन प्रिय सों मान, आजु औसि करिये सुनौ ।
 समुझि कहै जो प्रान, तासों कबहुं न रूसिये ॥

निषेधाभास लक्षण ।

पहिले करै निषेध को, फिरि ठहरावै ताहि ।
 कहत निषेधाभास हैं कबि आछेपहि ताहि ॥

यथा ।

चाहिये जो अब सो कहिये लखि कै सि-
 गरे बलि औगुन मेरे । तोसर सी ठकुराइन
 छोड़ि कहौ किन कौन के लागिहैं नेरे ॥ गो-
 कुल पाइन पानि धरें मनमोहन जू यों कहै
 हित हेरे । मोहिं न जानि तू प्रानप्रिया अरी
 प्रानप्रिया हम चरे हैं तेरे ॥ ३१० ॥

सोरठा ।

मो तन जोवन है न, पाप पाछिले जन्म को ।
पाद न रखियत नैन, तऊ सैन सौ विधि चलै॥

व्यक्त आक्षेप लक्षण ।

प्रगट जहाँ विधि देखिये है मूढो आक्षेप ।
व्यक्ताक्षेप कहै सुकवि अलंकार रसलेप ॥

यथा ।

कूकनि मोर पपीहन की सुनि देखति हैं
जू कदम्ब के मोरन । दौरत हैं ददुरान मिलौ
इन भिङ्गिन की भनकार के डोरन ॥ गोकुल
कीजै गनेस महा प्रभु आपुन सौं कहिये ककु
औरन । लेखन वैसन भावती की बली पेखत
हैं धुरवान की दौरन ॥ ३१३ ॥

सोरठा ।

करिय मान सुखनेत, हैं न आजु वरजति तुम्हें ।
लिय बियोगि विधिहेत, सुनी सूर सौं ससि कलौं॥

विरोधाभास लक्षण ।

अर्थ मुख्य सो अर्थ जहाँ भासित होइ विरोध ।
तहां विरोधाभास है जमक शब्द में बोध ॥

यथा ।

चैन चितौनि भली चरचा सँग जी लगिहै
 सँग जी लगि है ना । अंक कलंक को बंक
 ककू तनको लगिहै तनको लगि है ना ॥ गोकुल
 वा ठग सों ठगहारी गुनौ लगिहै सो गुनौ
 लगिहै ना । मोहन गोहन सो सजनी चख तौ
 लगिहै चख तौ लगिहै ना ॥ ३१६ ॥

सोरठा ।

लहि तो परम सोहाग, भर्द्द' सोहाग बिना सबै ।
 लखि सौतिन को भाग, बिना मानहू माननी ॥

विभावना लक्षण ।

कारन बिनु जहँ होत है कारज कौनौ सिद्धि ।
 अलंकार सु विभावना तहां कहत बुधिनिधि ॥

यथा ।

देखती जौ तब तौ कहती ककु रावरेही
 की हितू हम तौ हैं । चाहति रावरे के मुख
 की चखकोर कृपाभरी रावरी जोहैं ॥ गोकुल-
 नाथ से प्रानपियारे पै ते हैं अयानभरी जे

वै को है । कौन सो नाध्यौ है नाध लली अप-
राध बिना बलि तानति भौहैं ॥ ३१६ ॥

सोरठा ।

बिन कजराहू नैन, कजरारे लखियै लखौ ।
सोंधो सुतन कुवै न, उठति सोंधाई की लहरि॥

हेतुविभावना लक्षण ।

कारज जहँ असमर्थ है करै सो काज बलिष्ट ।
तासों हेत विभावना कहत सुकवि मतद्वष्ट ॥

यथा ।

दसहूँ दिसान कै दिगीस ईस अवनी के
परसि लजाइगे चढ़ाइ भुजभर जो । गोकुल
कहत जीन रंचक उठाइ सकै ऐसी तीन
लोकन में दानव अमर को ॥ जनक को सोच
जानकी को परताप देखि दयासिंधु मया करी
कैसी हरबर हो । देखो रामराय जू को कारज
कठोर तोखो पंकज से पानि सों पिनाक धरा-
धर सो ॥ ३२२ ॥

सोरठा ।

गिरि से उरज उतंग, भरे भार लागत लखौ ।
होति न कैसेहु भंग, दरभअनौ सी कटि धरे ॥

तृतीय विभावना लक्षण ।

प्रतिबंधक तहँ काज को कारन कहियै आनि ।
तिसरी होति विभावना कविजन कहैं बखानि ॥

यथा ।

रूपभरी तरुनी तिनको लखि तैसो बसै
चित सोभित कीन्हो । गोकुल मैर मनोभव
को नख तें सिख लों छरि कै भरि दीन्हो ॥
रावरे को गुन एजू बलाइ ल्यों पाइ परों ककु
जाय न चीन्हो । मोहन कै मन को सजनी तुम
मोहन से ठग को ठगि लीन्हो ॥ ३२५ ॥

सोरठा ।

कबहुंन छोड़तिरीति, निपटसुनीतिसुलाजवस ।
जासों हरि विपरीति, करवाई कहियै कहा ॥

चतुर्थ विभावना लक्षण ।

जाको कारन जो नहीं तातें उपजत तौन ।
कारज जाति को कारिता को है कारन भौन ॥

यथा ।

चम्पक की लतिका तें सुवास सुभालती
को पसरै सुखदैन री । कौल के कोस तें गन्ध
गुलाब को आवत है लहि दायक चैन री ॥ गो-
कुलनाथ कुहू निसि में यह राका के राति की
दाहऽव है न री । देखि कपोत के कांठ ते आली
कढ़ै कलकोकिल को बरबैन री ॥ ३२८ ॥

सोरठा ।

सखि अचरज्ज नवीन, जपा कंज कुसुमति भरो ।
दोढ़ सिरीफल पीन, फरी पेखि चम्पकलता ॥

पञ्चम विभावना लक्षण ।

जहाँ विरोधी कार्य को कारन कहिये देखि ।
उपजत कारज है तहाँ पच्यों भेद सुलेखि ॥

यथा ।

तू ठकुराइन है ब्रज की ब्रजठाकुर है
हरि क्यों न तकै तू । काहू चवाइन सों सुनि
कै भ्रमभूलिभरी सो कहा उभकै तू ॥ गोकुल
जोग न रावरे के इन सों इतनी रिसि कै उ-

मकै तू । आनन ऐन सुधा को हहा तिहि ते
दूतनो विष बैन बकै तू ॥ ३३१ ॥

सोरठा ।

तोही में गुन वाम, अरी वाम लखि परत है ।
बढ़त भयंकर काम, तो कुच संकर सेवतै ॥ ३३२ ॥

छठईं बिभावना लच्छन ।

कारज सो जहँ होत है कारन की उत्पत्ति ।
अलङ्कार सु बिभावना छठईं कहियत सत्ति ॥

यथा ।

आवतहीं जमुनातट ते सँग न्हाइ सखीन
के राधिका रानी । गोकुलनाथ मिल्यौ मग में
सो कहा करिगो कछु जात न जानी ॥ हाय
उपाय न जाय कियो ब्रज बूढ़त है बिनु पावस
पानी । धारन में अमुवान की है चख-मीनन ते
सरिता सरसानी ॥ ३३४ ॥

सोरठा ।

तो मुखचन्द अमन्द, स्मिति क्षीरधि ताते कढ़त ।
है चकोर नन्दनन्द, हंस होत आनन्दभरो ॥

विशेषोक्ति लक्षण ।

लहियत कारन बहुत जहँ कारजसिद्धि न होय ।

विशेषोक्तिऽलङ्कार सो तहँ कहियत है जोय ॥

यथा ।

होस बिनाही सरोस करी डून धूतिन दोस
सुनाइ प्रिया को । गोकुल कैसी भरी रस में
रिसि वोड़है यों बिस बैर बिया को ॥ चैत को
चन्द सुगन्ध समीर मिल्यौ सुर कोकिल काक-
लिया को । हारी मनाइ तज सजनी न गयो
रजनी भि मान तिया को ॥ ३३७ ॥

आवतही जमुनातट तें नटनागर डौठ
प्रखो अबलै की । ता छिन तें थहरानि थकी
सी रही जकि कै भरी काम कलै की ॥ गोकुल
कैसेउँ ताप की ताप सों एरी मिटे मन मध्य
अलै की । लाइ घनो घनसार सखी क्तिन प्याइ
दे बालहि बाइ मलै की ॥ ३३८ ॥

असम्भव लक्षण ।

जहाँ असंभव अर्थ की घटना करिये आनि ।

थाइ अद्भुत रस तहाँ आसंभव पहिचानि ॥ ३३९ ॥

यथा ।

दीन्हों देखार्इ अचानकहीं यह मानिनि मै
चित चेत हरैगी । थोरिही बैस में ऐसी हहा त-
रनापन तामे कहाधौं करैगी ॥ गोकुलनाथहि
नेकु लखें बिनु हाय कहौ कल कैसे परैगी ।
जानतही न इतो सजनी यह छोटी सी कोहरी
कैल करैगी ॥ ३४० ॥

सोरठा ।

कमलनाल सी बाल, गोरी थोरे दिनन की ।
उर धरि गिरवरलाल, बड़बोली बोलै बयन ॥

असंगति लक्षण ।

कारन कहूँ कारज कहूँ देस काल को बीच ।
कहत असंगति चख लगे बढ़तबिरह हिय बीच ॥

यथा ।

दानव दुज्जन के निकटौ बसिबो न भलो
यह मंत्र अराधौ । संगति दोस परोस लहौ दुख
पावत पापिन के संग साधौ ॥ गोकुलनाथ ति-
हंपुर के यह राम को काम बिचारि कै काधौ ।

सौयह लै दसकंध गयो है विरोध बिनाहीं स-
मुहर बांधौ ॥ ३४३ ॥

सोरठा ।

लहत उरोजन ओज, गहत गरव मन पीय को ।
तो उर बाढ़त बोझ, दवत जात हिय सौति के ॥

द्वितीय असंगति लक्षण ।

और ठौर चाहत कियो कियो औरही देस ।
कहत असंगति दूसरी जे हैं सुकवि सुबेस ॥ ३४५ ॥

यथा ।

कौल से कोमल हैं इन पै इतनी निरदै-
पनता न बिचारो । पीन कठोर हैं श्रीफल से
इन पै मन आवत सो निरधारो ॥ गोकुलनाथ
खेलार खरे यह तौ न भलो बलि खेल तिहारो ।
गेंद उठाइ उरोजन पै हरि जू ललना के कपोल
न मारो ॥ ३४६ ॥

तृतीय असंगति लक्षण ।

काज कियो चाहत प्रथम ताको कियो बिरुद्ध ।
कहति असंगति तीसरी अलंकार मतिमुद्ध ॥

सोरठा ।

सखि तो मनकी बात, हौं समझी हजके बसे ।
ताको तन पियरात, जाको तन कारो लगे ॥

तृतीय विषम लक्षण ।

उद्दिम करते दूष्ट को होत अनिष्ट जु आय ।
विषम अलंकृत तीसरो बरनत हैं कबिराय ॥

यथा ।

रूपगुमानभरी अबलौं सबही की दसा
सुनती उठ कोहि री । चोरिवे को चित से बित
को चलि आईही पौरि पै आवत जोहिरी ॥
गोकुल होत लखालखी पौरही है गयो चटक
सो चख पोहिरी । मै मनमोहन को कहां मोह्यो
गयो मनमोहनहीं मन मोहि री ॥ ३५७ ॥

सोरठा

सुख हित कीन्हो नेह, छैल छबीले लाल सों ।
पुरजन बाढ़े तेह, भटकि गयो नट अनतहीं ॥

चतुर्थ विषम लक्षण ।

होइ अनिष्ट न समुझि यह कियो दूष्ट व्यापार ।
प्रापति भयो अनिष्ट तहँ चौथो विषम विचार ॥

यथा ।

घैर बढै ब्रज में अति बैर लखै मुनतै रति
ते मति मोड़ी । आइ गयो जमुनातट तें नट
सो बनि गोकुल गावत टोड़ी ॥ नीठि दर्द हरि
पै डरि पीठि कै अंचन ओट द्विगंचल ओड़ी ।
दौरि मिली बरजी न रही यह ईठ कहा कहौं
ढीठि निगोड़ी ॥ ३६० ॥

सोरठा ।

जातें लगै न डीठि, यातें चख चावड़ दयो ।
सखि दीन्है हूं पीठि, डीठि लगी सबगांव की ॥

पञ्चम विषम लक्षण ।

उद्दिम करते इष्ट को भयो इष्ट सो सिद्धि ।
बहुरि अनिष्ट भए विषम है पचओं बुधिनिद्धि ॥

यथा ।

पौरि पै ठाढ़ी हुती अलि आजु त्यों आइ गए
हरि आनददानी । देखतही नख ते सिख लौं
सुख सो सरसी अखियां सियरानी ॥ गोकुल
बोलि नजीक उन्हें हिय सां लागि जैवे को ज्यों

ललचानी । हाय धौं आइ गई कितते इतने में
कहा कहौं धाइ धधानी ॥ ३६३ ॥

सोरठा ।

बोलि लयो हरिधाम, कामकलानिधि सों कछौ ।
ल्यौं आई वह वाम, घरहार्द बैरिनि बरी ॥ ३६४ ॥

षष्ठम विषम लक्षण ।

करत बुरी जहँ और को अपनोई छै जाय ।
विषम अलंकृत षष्ठ्यों बरनत हैं कबिराय ॥

यथा ।

डारि ब्रह्मफांसि फांसि ल्यायो दसकंधर पै
मेघनाद खेत मे ते देत दीह डंका को । बसन
लपेटि बोरि तेल सों लगाइ आगि कौतुक बि-
लोकिवे को बाढ़े छोड़ि संका को ॥ गोकुल
कहत गयो तरकि काँगूरन पै सुमिरि हिए में
राम राय रन बंका को । जारिवे को चाहत लं-
गूर जातुधान देखो बीर हनुमान जू जराय दई
लंका को ॥ ३६६ ॥

अपरंच ।

टूटत पिनाक धाक धावत धरा पै नेकु धी-

रज धरे न रहै दौरे आतुराई सों । बेर बेर करमे
कुठार को सुठार करें मलकत बार बार मति
रिस छाई सों ॥ गोकुल कहत धाम धनुष के
साथ लयो हाथ के कुवत राम सहज सुधार्ई सों ।
जीतिबे को आए भिगुनंद रघुनंदन को जीते
गये आपु भये रीते बीरतार्ई सों ॥ ३६७ ॥

सोरठा ।

मैं चख मन चित लाइ, बाकी पति हरिवे चह्यौ ।
मेरोई मन हाइ, जात रह्यो मोँ हाथ सों ॥ ३६८ ॥

सम लक्षण ।

वस्तु दोइ सम करत है बरनन जहँ कविराय ।
अलंकार सम कहत हैं ग्रंथन को मत पाय ॥

यथा ।

मानुष देव अदेवन में इनकी सरि को नर
और न कीन्हों । हेरि तिहूपुर में तिय में इनके
सम रूप न मै लखि लीन्हों ॥ गोकुल धन्य धरा
दरसी परसे इनके सरसी सुख चीन्हों । जोग
कखौ दूतनौ बिधि नैसम जानको को बर राम
सो दीन्हों ॥ ३७० ॥

सोरठा ।

जेहिबिधिरच्योगुपाल, तेहिठकुराइनिराधिका ।
लखिचखहोतनिहाल, समसरिजुगलकिसोरकी ॥

द्वितीयसम लक्षण ।

कारन के सम बरनियै कारज को जेहि ठौर ।
देखि सदसगुन रूप तहँ बरनत हैं सम और ॥

यथा ।

गरजत घन तरजति बिज्जु बार बार कूकत
हैं मोर पिक पपिहा गरेरे हैं । भ्रमकत जुगुनू
तिमिर जमकत जान बात सियरात लगैं गात
हहरेरे हैं ॥ गोकुल न ऐसी समै पीको कलपैयै
कल पैयै बलि जैयै कहा त्यौरन तरेरे हैं । ए-
तिक कठोर होत हियो तरुनीन को री याही
तें उरोज होत कठिन करेरे हैं ॥ ३०३ ॥

सोरठा ।

जगजीवन को दन्द, उदै होतहीं तम हरै ।
छौरसिंधु को नन्द, क्यों न उजरो होइ ससि ॥

तृतीय सम लक्षण ।

सिद्ध होत सोई अरथ उद्दिम करिए जौन ।
बिना द्रष्ट अश्लेस पद सम कहि तीजौ तौन ॥

यथा ।

कोटिन भँतिन कै कलकी वतियां तब
तौं हिय लाइ लये हो । देखति हों तो भले जु
भले प्रगटो नितहीं नित नेह नये हो ॥ गोकुल-
नाथ चलौ उतलों जब जैसो भयो तब तैसो
भयो हो । चाहतही तुम सों वह मान सो
नीको कछौ तुम मान दये हो ॥ ३७६ ॥

सोरठा ।

वह चाहतहीं साल, सारस कर बनिता नई ।
तुम बलि दई दुसाल, मुकुतमाल दैकै लई ॥

विचित्र लक्षण ।

उद्दिम फल विपिरीति को करि विचारियै जौन ।
अलङ्कार सु विचित्र सो है विचित्र अति तौन ॥

यथा ।

गोकुल कहत आज अजब तमासो लख्यौ
नरन को तरनितनुजा जू के तीर में । कुन्दन
सों अंग धसे धोवत उमंगभरे घन कैसो रंग
भरो चहत सरीर में ॥ राखिवे को लच्छि हिए

लच्छि त्यागि त्यागि एकै फूल भरे कूल बैठे धरें
मति धीर में । पीरौ कियो चाहत हैं चौर ते
पखारत हैं बीर इन्दीवर ऐसे जमुना के नीर
में ॥ ३७६ ॥

सोरठा ।

श्रुतिपथ लागे नैन, चाहत नसायो श्रुतिपथहि ।
हिय उभरोहौं हैं न, गहिरौ हौं चाहत भयो ॥

अधिक लक्षण ।

अधिक होत आधार जहँ पाइ बड़ो अधेय ।
कहत अधिक उलंकार तहँ जे हैं सुमति अमेय ॥

यथा ।

बेलि बूटी गुलुम बिटप वर वृन्दगन दनुज
मनुज पसुपच्छिन के कीस के । सरित समुद्र
धाराधर धाराधर धरा दिसन समेत लोक दि-
ग्गज दिगीस के ॥ गोकुल नखतगन ग्रह व्योम
वायु तेज सुरन सहित सुरपति बिसे बीस के ।
इतनो जगत जाके उदर बसत सोई सोवतु है
जगदीस ऊपर फनीस के ॥ ३८२ ॥

अपरञ्च ।

मुरली मुकुट औ लकुट बनमाल गरें गुन
की विसाल छविपुंज भरी भारी है । किंकिनी
ललित सो बलित बिलसति लोनी काछनी
कलित कटि पीतपट वारी है ॥ गोकुल वि-
लोकि कौन सकत सकल सोभा पानि पाय
पेखि जाति पलक न पारी है । रावरे के नैनन
की कहां लोँ बड़ाई करौं जिन में बसत भा-
वती जू गिरिधारी है ॥ ३८३ ॥

सोरठा ।

सब जग जाके हीय, बसत सो गोकुलनाथ है ।
उर धरि राख्यौ तीय, तैं ताको कहिये कहा ॥

द्वितीय अधिक लक्षण ।

अधिकार्द्ध आधार की लहि अधेय अधिकाय ।
अलंकार सो अधिक है दूजो अति सुखदाय ॥

यथा ।

सासन सों पिता के सिंघासन सो त्यागि
आइ कीन्हो बनोबास धर्यो बलकल चौर को ।

द्वैतन सँघारि कै विहार दंडकारन को टारि
 दयो सोच सो सकल ऋषिभीर को ॥ गोकुल
 कहत आए कुंभज के धाम राम हरष कछौ न
 जात मुनि के सरीर को । जिनके उदर में स-
 माइ गो समुद्र ताके उदर समातु है न जस
 रघुबीर को ॥ ३८६ ॥

सोरठा ।

गिरि ते उरज उदार, तू उरमें गिरधर धखौ ॥
 तो बेनी को भार, नहिं तो सो धरि परै ॥ ३८७ ॥

सूक्ष्म लक्षण ।

तनु आधेय लहे परै जहां सु तनु आधार ।
 तह सूक्ष्मलंकार है बरनत सुमति उदार ॥

यथा ।

पंकज से पग पानि लसैं चख चंचलता न
 लखी चपला में । चंद सो आनन पीन उरोज
 कसे भुज कंचुकी कोर बला में ॥ गोकुल रोम-
 वली त्रिवली भरी नाभि सरोवरि कामकला
 में । लाल मिलाइहौं बाल तुम्हें वह जाकी
 करौ कटि छीन छला में ॥ ३८८ ॥

सोरठा ।

मन यासों लपटाइ, बलै भयो बलि लाल को ।
यातें ककुक लखाय, लंक कवीली कैल को ॥

अन्योन्य लक्षण ।

जहां परस्पर हित तहां अन्योन्यालंकार ।
ज्यों मनिमालन तें उरज लसत उरज तें हार ॥

यथा ।

वै उनसों रति को उमहैं फिरि वै उनसों
विपिरीति कीं रागैं । वै उनको पटपीत धरैं
अरु वै उनहीं सो निलंबर मागैं ॥ गोकुल दीज
भरे रसरंगनिसा भरि यों हिय आनंद पागैं ।
वै उनको मुख चूमि रहैं तब वै उनको मुख
चूमन लागैं ॥ ३६२ ॥

सोरठा ।

रँग गोरे सो स्याम, लसत गोराई स्याम लहि ।
घन तें दामिनि काम, दामिनि तें घन घन फवै ॥

विशेष लक्षण ।

सो बिसेष आधार बिनु जहँ अधेय सुखरास ।
ज्यों विकुरेहूं मीत के लगी रहत मन पास ॥

यथा ।

जोई चहै हम सोई कहैं वै भरी हित प्रेम
महा महती हैं । खौन सुधा सम चातिक प्राण
को स्वाति के बूढ़न लों लहती हैं ॥ गोकुल जे
हीं अलीमन कों मधु सौ विषके गुन ते गहती
हैं । मोहन के मथुरा के गए अब वै बतियां
हमकों कहती हैं ॥ ३६५ ॥

सोरठा ।

वैसेई करि अंग, वैसेही वैसी गढ़त ।
बसी छाड़ि रति रंग, तो सीबी संग लाल के ॥

द्वितीय विशेष लक्षण ।

बहुत ठौर कहियै जहां एक वस्तु को बूझि ।
यही विसेष कहैं जिन्हें परत सास्त्र मत सूझि ॥

यथा ।

कोठरी आंगन पौरि गली में अली गुरु-
लोगन में महती हौं । घाट में बाट में गोधन
ठाट में कुंजन पुंजन में गहती हौं ॥ गोकुल
नाथ बनो नट सो तट लागी रहै तुमसों कहती

हैं । नैनन में मन में हिय में जिय में वह
मूरति सें लहती हैं ॥ ३६८ ॥

सोरठा ।

सब छिन सांझ सवेर, और बाग बन घर गली।
सुनत बांसुरी टेर, बीर बुरी बसिवो दूतै ॥ ३६९ ॥

द्वितीय विशेष लक्षण ।

थीरहीं आरंभ्य जहँ पैयें वस्तु अलभ्य ।
यही विसेष कहै सुनो जेहँ जग में सभ्य ॥ ४०० ॥

यथा ।

सोवत हूँ जागत हूँ सौतुक सपन हूँ में
रावरे को मन और बाम में न लेख्यौ मैं । से-
वाही सों उचित रुचति रेनु पाइन कौ चाइन
सों इन्हें भली भांतिन सरेख्यो मैं ॥ गोकुल
कहत चिर जीयो प्रियो आनंद कों तुम सो न
भागभरो भू पै और पेख्यो मैं । दंपति तिहारो
प्रेम अति अभिराम सुनो आस कहौ आजु सी-
ताराम जू को देख्यो मैं ॥ ४०१ ॥

सोरठा ।

सखि लखि बदन उजास, पाटीबंदन माग यों ।
बोली ससि के पास, लही त्रिवेनी तो लखे ॥

व्याघात लक्षण ।

अन्यथा कारी है तथा कारी सो व्याघात ।
तथाकारि औ अन्यथा कारी जहँ है जात ॥

यथा ।

मोहन के बिकुरे सजनी दुखदानि लगै
सुखदानि हो जोई । चौसर चंदन चारु दुकूल
लगैं सखिसूल से हैं सब ओई ॥ गोकुल खैबे को
चांदनी में जो कहै तू कहा है अरी भ्रम भोई ।
जौन उबारत हो तन ताप सो जारतु हैब सुधा
धर सोई ॥ ४०४ ॥

सोरठा ।

सुख कर हुतो जो प्रेम, अलि सोई दुखकर भयो ।
सो पावत कहँ छिम, बसत जो पास अहीर के ॥

द्वितीय व्याघात लक्षण ।

सो कारज निबड जहँ अपने है अवदात ।
कारज विरोधी होइ सो यही कहैं व्याघात ॥

यथा ।

क्योंकरिकै कहिये तुम जाह न जाह क-
हौ तो चलैगौ बलौना । जौ न लिख्यौ दुख औ

सुख भाल सो कोटि करै निघटै गोपलो ना ॥
आए हो बूझन मोसों मया करि गोकुलनाथ
पियारे क्लो ना । दारी कहौ बनवारी गई
बलि प्यारी कहौ तो रहौ जू चलो ना ॥४०७॥

सोरठा ।

जौ प्रभु जानत मोहि, दीन दूवरी अति दुखी ।
तौ न छाड़िबे तोहि, दीनबंधु करुणाअयन ॥

कारनमाला लक्षण ।

जहँ पूरुब पर हेतु की गुंफित कीजै माल ।
कारनमाला कहत हैं ताकों सुमति बिसाल ॥

यथा ।

कौन घरी हुती जो गई ही कालिंदी के तीर
बीर धौं कहाते परे नैन वा बिलासी में । नैनन
ते लोभ बढ्यौ लोभ सो लगनि बाढ़ी लगनि
से बाढ़ी मन डरत न हांसी में ॥ गोकुल ति-
हारी सौंह मनते बिरह बाढ़्यौ बिरह ते बाढ़्यौ
प्रेम फांसे लेत फांसी में । प्रेम सों बढो है बड़ो
चौचंद चढो है देखो घेर घरहाइन में बैर ब्रज-
बासी में ॥ ४१० ॥

सोरठा ।

लखि चख बाढ़ी नेह, बढी नेह तें लगनि चित ।
अब सखि दाहतिदेह, बिरहागिनिबढ़ि लगन तें ॥

एकावली लक्षण ।

गहिगहि छोड़त अर्थ को जहँ सेनी की रीति ।
जपमाला कैसी बढी एकावली भु रीति ॥४१२॥

यथा ।

कहत सलोनौ सब साँवरो अहीर एरी बीर
की सौं कौन गुन वामें उभरतु है । औचक
प्रभात जात गली में बिलोक्यौ आजु ताछिन
तें ही में बिरहानल बरतु है ॥ गोकुल जहान
में सुनति उपखान है री सुधा सुधा ऐसो विष
विष सो टरतु है । रूप लाग्यौ नैनन सों नैन
मिले मन सोई मन लग्यौ प्रान पापी पीड़ित
करतु है ॥ ४१३ ॥

सोरठा ।

घर तजि आँगन आइ, आँगन तें कढ़ि पौरि पै ।
पौरिछोड़ि बनजाय, फिरति बावरी लों बिकल ॥

मालादीपक लक्षण ।

होत जहाँ एकावली औ दीपक को संग ।
मालादीपक लसत ज्यों मिले पयोनिधि गंग ॥

यथा ।

मन परबस होत गोत में अकस होत सी
तह्यौ चवाय को समुद उभरतु है । छीन होत
अंग पीन होत रंग पीरो हीरे ज्वाल सी जरति
चैन बारि सो ठरतु है ॥ गोकुल गसीले होत
गुनगरुवे जे हरुवे ते अरसीले होत जस उतरतु
है । नैन लागे नैनन सों नेकौ न लगति नैन
पल को परति है न चैनन परतु है ॥ ४१६ ॥

सोरठा ।

धुनि स्त्रौन न परिजाय, जायनगुनिदुरजनसजन।
जन तन मन न सोहाय, हायबाँसुरी गोप कर॥

सार लक्षण ।

अर्थन को उत्कर्ष जहँ उत्तर उत्तर होत ।
अलङ्कार सो सार है बरनत हैं कवि गोत ॥

यथा ।

सुमति भली है फेर सरधा भली है तासों

रसना भली है हरिगुन उचरन की । तासों भली
विरति विसास की हिये में और तासों भली
कीरति भगीरथ वरन की ॥ गोकुल भली है
भीर तासों उपकार की औ तासों भली सोभा
रनभूमि के धरन की । तासों भलो असरन स-
रन बसाइबो है भगति भली है तासों गुरु के
चरन की ॥ ४१६ ॥

क्रमिका लक्षण ।

जथासंख अन्वय जहाँ क्रम सों लैये जानि ।
तहँ क्रमिकालङ्कार है वरनत सुकवि बखानि ॥

यथा ।

सम्पति में विपति में नृपतिसभा में कुमा
धीरज भलो है चातुरी के सरसाये तें । रन मन
तरुनी सों रोष तोष रस रीति नौति सों करै
तौ लहै आनंद सोहाये तें ॥ गोकुल सु कवि
कहैं गरब गरीबन सों ऐड़ दया मेड़ बाँधै बीरज
के दाये तें । सचुन को मित्रन को परम पवि-
चन को घालियतु पालियतु पूजियतु पाये तें ॥

सोरठा ।

कच कुच चख चित बोल, चतुर कहे तरुनीन की।
कुटिलकठिनअतिलोल, नीतिनिठुरगरबनभरे ॥

परजाय लक्षण ।

एक बीच परजाय जहँ कीजै बहूत बिचारि ।
अलङ्कार परजाय सो बरनत सु कवि निहारि ॥

यथा ।

जोब नहीं जगति ललितपन जोति आली
पोत सी सुतापन के खेल की रई नई । सन्धि
है अज्ञात भई ज्ञात भई ज्ञान बस है करि न-
बोढ़ाहि एँ पौढ़ा उर सों छई ॥ गोकुल कहत
लाज काम मध्य मध्या भई महाबली काम देखो
लाज लूटि सी लई । छूटि परी छवि कैसी मूठि
गौनहाई संग वहै वैस बाल अंग है गई तरु-
नई ॥ ४२४ ॥

सोरठा ।

तो कुच की अनुहारि, रही गरब गरुऔ गहे ।

*

*

*

*

*

द्वितीय परजाय लक्षण ।

कै परजाय जहां कहै एकहिं ठौर अनेक ।
अलङ्कार परजाय सो कहत सु कवि गहि टेक॥
यथा ।

रीति तैं पलटि कै अनीत में चलन लागै
धरम छलन लागै अधरम काम में । सीलता
सुधार्इ सूरतार्इ बिसरार्इ सबै कुटिल कुरार्इ
कदरार्इ करै काम में ॥ गोकुल सुकवि कहै
सज्जन सों दूरि रहै संगति असज्जन की चाहै
चारौ जाम में । देखो कलिकाल के नकाम ये
करम मन सुमति को छोड़ि बसै कुमति के
धाम में ॥ ४२७ ॥

सोरठा ।

जहि हिय गहि सयान, अरि अलि तू आइ चितै।
तेहि अब नछौ सयान, सौक भांति धीरज धरै॥

परिब्रत लक्षण ।

थोरो दै कै लीजिये अधिक सो परिब्रत नेत ।
पोत हरा लख तै कोऊ लाल बिरानो लेत ॥

यथा ।

बीचज न राख्यौ जैसो भाख्यो तैसो भाख्यौ
भलें ताको फल चाख्यौ मतिही ते कीजियतु है ।
साँच माँच साँच के हो साहेब सरस सिन्धु जैसो
कौल कीजियतु तैसो कीजियतु है ॥ गोकुल
बिहारी हो तिहारी परमिति आगे और देखिबे
को न हिए में जो जियतु है । तनक देखाई पाव
पाव परों प्रानप्यारे ऐसे और काहू को जू मन
लीजियतु है ॥ ४३० ॥

सोरठा ।

तनक अधररस प्याइ, हाय कहा कहिये तुम्है ।
लयो लाल अपनाय, रूपसुधासागर अमल ॥

परिसंख्या लक्षण ।

कारि निषेध थल एक तें राखी औरै ठौर ।
वस्तु धर्म गुन जाति जहँ परिसंख्या तेहिं ठौर ॥

यथा ।

बेल बीच कण्टक औ साल सालबाफन में
खल के समूह रहै वैदन के घर में । वज्रता क-

लङ्क ससिशृंग में सरेखी परै रहे है संताप
 सही सूरज के कर में ॥ गोकुल कहत रघ्यौ दा-
 रिद दरिदही को नीरसता मही में रही है मरु
 धर में । बैठतही रामचन्द्र रावरे के राज रघ्यौ
 रिन्द नाममाहि अरविन्द सरवर में ॥ ४३५ ॥

सोरठा ।

उरज उचाई लङ्क, तनुतार्द्र चखचपलता ।
 सब जग तें विनु सङ्क, लै विधि कै एकत धरी ॥

विकल्प लक्षण ।

तुल बल बीच विरोध जहँ लखौ वरनिये आनि।
 नित्यनियमजहँ होत नहिं तहँ विकल्प अनुमानि ॥

यथा ।

जानि परै जू खेलार बड़े अरु फागु के खे-
 लिवे में निपुनै हौ । चाव चढ़ौ चपला सौ हैं
 वै उनकी तन छाँह न छूवन पैहौ ॥ संग सखानि
 लये तुम गोकुलनाथ जबै वरसाने में जैहौ ।
 शौचप्रभानलली को सखीन सों जीतिहौ कै
 बलि हारि कै ऐहौ ॥ ४३६ ॥

सोरठा ।

उनके कुचन समान, सानु कहौ कलधौत के ।
सुनि बलि परमसुजान, छैहै कै छैहै नहीं ॥

समुच्चै लक्षण ।

बहुत भाव के गुँफ जहं एक समै में होत ।
कहत समुच्चै ताहि सब जेहैं कवि के गोत ॥

यथा ।

रमै पति संग रतिरंग में उमंगभरी सरस
सुटंग पढ़ी कामकला बंक में । ससकि सि-
कोरै नाक जोरै चखचातुरी सों जवीसी उकसि
भरै भावतें को अंक में ॥ गोकुल को अधर-
मधुर मधुप्यावै प्रियै * * * * * सुरति
परजंक में । गौहीं सतरौहीं होति बिहँसि ल-
जौहीं हेरि सङ्गि सी सिकुरि कै लचक डारै
लङ्क में ॥ ४३६ ॥

सोरठा ।

मसकिसिकुरिसतराति, बिहसौहीं भौंहनिचितै ।
नटति कुटति बतराति, रतिरस राती लाल सों ॥

द्वितीय समुच्चै लक्षण ।

अहं शब्द को कीजिये जहाँ प्रथमही रूप ।
यही समुच्चै कहत हैं जे जग में कविभूप ॥

सीरठा ।

मेरो गुन लखि रूप, तुल न होत रतिमति भरी।
मेरेही बस भूप, जन तन मन धन दै भयो ॥

यथा ।

पूत इन्द्रजित सो सपूत सब भाँतिन में
जङ्ग जुरे जाके होत देवता न नेरे हैं । भाई
कुम्भकारन सहार्द्र रनभूमि भिरे जातुधान बल-
वान सुभट घनेरे हैं ॥ गोकुल कहत कहा मा-
नुष विचारे दाइ बानरौ समररूढ़ होत कहूं
एरे हैं । सङ्कर समेत जापै तौल्यौ रजताचल
को हैं रे कीस बीस ऐसे दोरदण्ड मेरे हैं ॥

कारकदीपक लक्षण ।

क्रमगतिभावसमूह को जहाँ गुंफ द्वै जात ।
कारकदीपक कहत हैं जे जग मति-अवदात ॥

यथा ।

आइ मिलै निति साँझ भये चितचोप क्ये

सिगरी निसि जागैं । अंग अनङ्ग तरङ्ग प्रकासत
दोज दुहूँन सों आनँद पागैं ॥ गोकुल भोर चलैं
घर को चित ऐसे बिछोह के छोह सों तागैं ।
हैक चलैं पग फेरि थिरैं फिरि दोज दुहूँन बि-
लोकन लागैं ॥ ४४५ ॥

सोरठा ।

नटतिकहतिनटिजाय, कहतिगहतिगरुऔगरब ।
मैं करि थकी उपाय, पी पायनि पारौ चहति ॥

समाधि लक्षण ।

कारन अन्तर को जहाँ लहि कै समै सहाय ।
कारज को को कार्य जहँ तहँ समाधि छै जाय ॥

यथा ।

सति भाग भरी है अरी वह ग्वालनि गो-
कुलनाथ के प्रेम पगी । अति रूपमई नख तें सि-
खलौं तरुनापन की तन जोति जगी ॥ जबलों
मिस कै प्रिय पास चलै हुती जोन्ह की जोति
बिलोकि ठगी । घन कै तम को तबलों दिसि
घेरि घटा घन की घहरान लगी ॥ ४४८ ॥

सोरठा ।

आइगयो प्रिय गेह, कछु कारज को मिस लये ।
सखि बिधि राख्यौ नेह, नँदनन्दन त्योंहीं चल्यौ॥

प्रत्यनीक लक्षण ।

जहाँ पराक्रम पक्ष पर बली सत्रु के होत ।
प्रत्यनीक बरनत तहाँ जेहैं कवि के गोत॥४५०॥

यथा ।

मानति नाहिँ मनाय थकी सुनि हारि रही
करि कोट कला कों । हौं दूतकी हितकी मिति
चाहि चुख्यौ न धरौ मन मोद पला कों । भा-
वती जू हितु हौ तौ सहाय करौ जो चहौ
उनके ऽब भला कों ॥ रावरे के मुख सीं गयो
हारि सतावतु है ससि नन्दलला कों ॥ ४५१ ॥

सोरठा ।

तो कच तें घनहारि, बैर भख्यो बारिद परै ।
दूतको हित निरधारि, गरजि गरजि तरजैउन्है ॥

काव्यार्थापत्ति लक्षण ।

जहाँ अर्थ कैमुत्तको कहि कीजै पद सिद्धि ।
काव्यार्थापत्ति कहत हैं अलङ्कार बुध्निनिधि ॥

यथा ।

श्रीवृषभानलली अँग तेरे कखौ सिगरे उ-
पमान को गञ्जन । पाइन कञ्ज उरु कदली
कुच कोकनहूँ को कियो मद भञ्जन ॥ गोकुल
आनन इन्दु अमी निदरै मुसुकानि करै मन
रञ्जन । जीति लयो इन तीरुन वाननि ईरुन
सोहै कहा कहै खञ्जन ॥ ४५४ ॥

सीरठा ।

तो कुच तें गिरिसानु, हारि हारि पाइन भये ।
को सम कहत अयान, का ये श्रीफल तनक से ॥

काव्यलिङ्ग लक्षण ।

जो समर्थ जेहि काम में ताको कहिये अर्थ ।
जा कारज में कहत तहँ काव्यलिङ्ग सामर्थ ॥

यथा ।

लाजन तें गुरुलोगन की न कछूँ मैं कछौ
अब लौं दिन खिये । क्यों बकवाद बढ़ावाति है
चलि जाहि जितै हित कौ चित भये ॥ गोकुल-
नाथ बिसासी के और कहाँ लगलों कहि ऐगुन

रे ये । क्यों करि मैं सतैहै उन्हें उनतौ उनके
कुच शङ्कर सेये ॥ ४५७ ॥

सोरठा ।

मान तपनि तिय अंग, कौन भाँति रहिहै अरी ।
लहि पूनो परसंग, देखि सुधासागर उदै ॥ ४५८ ॥

अर्थान्तरान्यास लक्षण ।

कहि सामान्य बिसेष कहि यों अर्थान्तरन्यास ।
मिटत खेद याके लखें ज्यों जलधर तें प्यास ॥

यथा ।

जोई घरी थिर है मन दै कमलापति को
धरि रूप निहारै । सोई परै भव बारिध पार
दसौदिसि में जस जोति पसारै ॥ गोकुल पाइ-
न छै निकसी हरि के सिंगरे जग कीं निर-
धारै । तारति देखो चराचर को यह भागीरथी
अवओघ बिदारै ॥ ४६० ॥

सोरठा ।

होइ न कौन कठोर, निति बसि हिय तरुनीनके ।
लखि बलि उरजन ओर, और कहाँ लगहीं कहौं ॥

अपरञ्च ।

गोकुल हेरि बली-गुन-कीमति कोमलता
कछु काढ़ि नई को । फूलन के धनु वानन सों
मनमथ्य मथै सिगरी जगती को ॥ कौन करै अ-
चरज्ज अरी समरत्यन की लखि ये करनी को ।
बाँस की बाँसुरी बाय-भरी यह बेधति है तरु-
नीन के हो को ॥ ४६० ॥

द्वितीय अर्थान्तरन्यास ।

कहिये प्रथम बिसेष जहँ फिर सामान्य सरूप।
सो अर्थान्तरन्यास है दूजो सुनहु अनूप ॥ ४६३ ॥

तथा ।

मन्दर सो गरु सारमई जेहि टारि सके न
सुरासुर जैहैं । सो रघुनाथ भुजान के जोर सों
घोर पिनाक को टूक करैहैं ॥ गोकुल बैस कि-
सोर चितै मिथिलापुर के अचरज्ज नए हैं । कौन
अकत्य कहै दूतनो समरत्य बलीन के कारज
एहैं ॥ ४६४ ॥

सोरठा ।

खल कल लेन न देत, ससि बैरी विरहीन को ।
बलि एसोई नेत, कहत कलङ्किन को जगत ॥

विकस्वर लक्षण ।

कहि विसिष सामान्य कहि फ़िरि विसिष को रूप ।
कहत विकस्वर कवित में तासों सब कवि भूप ॥

यथा ।

बारिद बाँधि सिलानि सों राम जू लै कपि
को दल रावन माखो । कारज ए समरत्यन के
चहिये दून कौ न अकत्य विचाखो ॥ गोकुल देत
कहैं सो सुनो सत मानि हिये मति में निर-
धाखो । गोपन के हित हेत गोपाल लखौ
सिसुतापन में गिरि धाखो ॥ ४६७ ॥

सोरठा ।

सिर चढ़ि बढ़ि नत केस, भए यहै गति बड़न की ।
लघु गुरु भए विसेस, उरज तनेजे हैं तज ॥

प्रौढोक्ति लक्षण ।

काह्न के उतकार्ष हित हेतु बरनियै और ।
अलंकार प्रौढोक्ति सो बरनत कवि सिरमौर ॥

यथा ।

पान किए हूं दवानल कीं जेहि को अधरा
रस नाहिं डढ़ै री । ताके लगी मुख सो यह

जाइ तो ज्वाल सी ताननि क्यों न गढ़ै री ॥
गोकुलनाथ के हाथ बसी है बिसासिनि नाथि-
बे ही को कढ़ै री । छेदति या हियकों बँसुरी
सखि पाहन फोरि कै बाँस कढ़ै री ॥ ४७० ॥

सोरठा ।

तो भौंहन की रेख, लेखि परै ऐसी हिए ।
चित दै है अनिमेष, करी काम कमनैत की ॥

सम्भावना लक्षण ।

एसी होइ तो होइ यों करियै ऐसी तर्क ।
अलंकार सम्भावना कवि कमलन को अर्क ॥

यथा ।

संकर सेइ है खेइ बड़ो तप लेइ है जो पर-
दान महेतू । काम सो कै हितमाम सरूप को
माँगि सुधा सों सवारि नहैतू ॥ गोकुल सूर की
पूरी प्रभा तन कीरसमुद्र में न्हाइ रहैतू । एरे
सुधानिधि एती बनै सरि राधिका के मुख की
तौ लहैतू ॥ १७३ ॥

सोरठा ।

अंधतमस के कूप, परै न्हाइ निति कालिँदी ।
तो रोमावलि रूप, लहै पद्मगी तौ तनक ॥

ललित लक्षण ।

वस्तु तके जहँ वाक्य के अर्थ वर्ण अनुमान ।
जहँ बरनी प्रतिबिंब तहँ ललित कहौ मुखदान॥

यथा ।

मानि चबाइन को कहिबो मिलिहैं बड़-
ताप के ताप जरें का । फेरि परौगी हहा करि
पाइन रुसि गये प्रियपाय परें का ॥ गोकुल-
नाथ मिलें बिनु जौं निमि नास भई फिरि मान
मरें का । जोवन वैसही बीति गयो बिरधापन
में पुनि व्याह करें का ॥ ४७६ ॥

सोरठा ।

बिनु सहचरी सहाय, मिलो चहति नटनागरहि ।
कछु सखि कछ्यौ न जाय, बिनपाइनचलिबोचहै॥

मिथ्या लक्षण ।

जहँ मिथ्या को सत करै कहि मिथ्या जन और ।
मिथ्याध्यवसित कहत हैं अलंकार तेहिं ठौर ॥

यथा ।

गोकुलनाथ सुनौ बन में यह आजु बड़े
अचरज्जहि लेख्यौ । एक ससा गहि दौरि कै

सिंघहि फारत पेट पकारत पेख्यौ ॥ भीत कहौ
यह सो सब साँच है ईश्वर की महिमा अब-
रेख्यौ । इंदुर एक दुरद को आजु नदीतट में
रह्यौ लीलत देख्यौ ॥ ४७६ ॥

भोरठा ।

मैं चढ़ि सौध अमन्द, गहे मूठि भरि कै नखत ।
भीत महं गहि चन्द, अंक लए कबलों रह्यौ ॥

प्रहर्षन लक्षण ।

जतन बिना जहँ होति है मन बांछित को सिद्धि ।
कहत प्रहर्षन मुकवि सब अलंकार में रिद्धि ॥

यथा ।

न्हात लख्यो जमुनातट जाकी सुबास की
आस लगी अलिसैनी । चारु चकोरन की अ-
वली मुखचन्द सो चाहि रही सुखलैनी ॥ गो-
कुलनाथ बिलोकि बिकाने से दूतिन को निधि
लों कहि दैनौ । ईठ बसीठ सुनो तब लों पठयो
उहि आपुहि अबुजनेनी ॥ ४८२ ॥

सोरठा ।

सुनि हरि के गुनगान, मै ललचौहीं है रही ।
आइ गयो सुखदान, आजु अचानक भौन में ॥

द्वितीय प्रहर्षन लक्षण ।

अधिक अर्थ की प्राप्ति जहँ मनवांछित में होत ।
यही प्रहर्षन मिलति ज्यों मुकुता चाहत पोति ॥

यथा ।

हीरो छेदाय खिलाय कै अंगनि हाट अनेक
फिरे न थिराने । गोकुलनाथ सनाथ के हूबे को
हेरतही मन में ललचाने ॥ आपुन के कर में
बसिवे को ये याही तें रावरे हाथ बिकाने । भाग
लखौ मुकुतान को एजू हरा है उरोजन सों
लपटाने ॥ ४८५ ॥

सोरठा ।

सुनिवे को तो-बैन, खरे पौरि पासहिं हुते ।
अमित लछो हरि चैन, दयो कृपाकरि तुम चितै ॥

तृतीय प्रहर्षन लक्षण ।

कारनबिन जहँ हात है लाभ तुरितही सिद्धि ।
यही प्रहर्षन कहत है अलंकार में रिद्धि ॥ ४८७ ॥

यथा ।

गोकुलनाथ मिल्यौ तट पै धरि कै डकठे
पट साथही न्हायो । जात रह्यो चितचोर कहीं
हो मरू करिकै धर धाम लों पायो ॥ भाग
कहा कहिये अपनो चह्यो दूतिन को धन दै कै
पठायो । ईठ सुनौ कहिअै तबलों वह ठीठ ब-
सीठ ह्वै आपुहीं आयो ॥ ४८८ ॥

सोरठा ।

धन दै पठै बसीठ, आवतही अपने सदन ॥
मिली बीचही ठीठ, ईठ पीठि देत न बनी ॥

विषादन लक्षण ।

मनबांछित में होत जहँ अर्थविरोध अमान ।
कहत विषादन कुंद ज्यों लहत उदै ते भान ॥

यथा ।

आजु कह्यौ मनभावन सों मैं अटा पर फू-
लन-सेज बिकैअै । चैत की चांदनी चाव बढी
मो निसा भरि कै रतिरंग मचैअै ॥ गोकुलनाथ
कहेंगे कहा सखी कौन उपाइ किये हिय लैअै ।

आइ गयो पति हाइ बिदेस तें जाय कहे न
कहा कहौं दैअै ॥ ४६१ ॥

सोरठा ।

मैं चाह्यौ गहि पीय, हिये लाय आनँद भरौं ।
त्यों घरहाई तीय, आइ गई बैरिन बरो ॥

उल्लास लक्षण ।

गुन तें गुन अरु दोष ते दोष होत उल्लास ।
दूषन तें गुन होत जहँ गुन तें दूषन पास ॥

गुन तें गुन यथा ।

पाइन पीडुरी जंघ नितंब भरी बिधि लंक
लोनाई हितै कै । नाभियली बलि रोमवली
कुच कुंभनि के करिकुंभ जितै कै ॥ गोकुल
पानि भुजानि लखे मुख नैनन देत अमी अमि-
तै कै । क्यौं बस होहि न भावती जू मन भाव-
तो रावरो रूप चितै कै ॥ ४६४ ॥

गुन ते दोष यथा ।

सोर पख्यौ सिगरे जग में उलह्यो ब्रजभूप
को पूत नयो है । देखिवे को उमह्यो सब लोग

लखे मन मोद की मूरिमयो है ॥ गोकुल हींहू
हिण हरखी चलि चाहतही गिरि ज्ञान गयो
है । आंखिनही पद पैठि गयो ऽव वहै न ठरी
नटसाल भयो है ॥ ४६५ ॥

मुद्रा लक्षण

सूच्य अर्थ सूचन जहां प्रकृति अर्थ में होय ।
अलंकार मुद्रा तहाँ बरनत है कवि लाय ॥

यथा ।

मीर-किरीट कुटो जुलफैं मकराकृत कुंडल
कान निरेख्यो । गुंजहरा मखतूल कुरा कटि
काकूनि पीत पितंबर भेख्यो ॥ गोकुल गावत
बेनु बजावत रूप सों मै न लजावत लेख्यो । है
सुधि तोहिं अरी जमुनातट पै नट जो वह
वा दिन देख्यो ॥ ४६७ ॥

रतनावली लक्षण ।

प्रकृत अर्थ क्रमसों जहां बरनत है कविलोग ।
अलंकार रतनावली ज्यों रतनन की जोग ॥

यथा ।

फागुन में मधु माधव में अरु जेठ असाढ़

लिखै मनमाने । सावन भादव आश्विन का-
 तिक औ अगहनहु में न भुलाने ॥ गोकुल पूस
 में माघहु में बदे औषि के भूठे कितेक ठिका-
 ने । आवन के मनभावन जू के अरी सजनी
 परै मास न जानै ॥ ४६६ ॥

सोरठा ।

पग पिडुरिन चढ़ि लंक, बलि रोमावलि उरजपै ।
 सनमुख रूप असंक, लहिभूलो कच घन गहन ॥

तदगुन लक्षण ।

छोड़ि आपुनो गुन जहां औरन को गुन लेत ।
 अलंकार तदगुन तहां बरनत हैं करि हेत ॥

यथा ।

भार भयो विरहानल भार सों भौन भटू
 दूतनो तपयो है । खास समीर कीलूवन ते मनो
 ईधन के ठिग जान गयो है ॥ गोकुल पी-
 तम प्यारे बिना करि जात कछू न उपाय नयो
 है । भावती के तनताप-तपे यह माह अरी
 जरि जेठ भयो है ॥ ५०२ ॥

सोरठा ।

पहिरावति नहि संक, मुक्तहरा तिय के गरे ।
लखि लचकौहीं लंक, बारभार तें होत गुनि ॥

पूरुव रूप लचन ।

तजि औरन को गुन जहां गुन अपनोई लेत ॥
पूरुवरूप तहां मुकवि वरनत हैं करि हेत ॥

यथा ।

भागभरी ठकुराइन जू तिय और न आ-
पुन सी अनुमानो । क्यों न वसै वस भावन तो
गुन रूप बिलोकि बिलोक सयानो ॥ गोकुल
बेसरी को मुकुता यहि भांति लख्यो मुखमा
सरसानो । लाल भयो अधरा रँग सों मुसुकानि-
मढ़ो मुकुतै ठहरानो ॥ ५०६ ॥

अपरंच ।

कै सब सेत सिंगार चल्यो तुम भेटिबे को
वन मै वनवारी । सोचति जौ मन को धनि तू
लखि जाइबे को कछु होन डरारी ॥ गोकुलनाथ
बिलोकि बलाइ ल्यों चारुता चारु चहूंघा बि-

हारौ । आठयें के ससिहूँ के अथौत भई मुख
रावरे की उँजिआरी ॥ ५०७ ॥

सोरठा ।

भयो सुतन तो स्याम, स्याम भयो तोतन सरस ।
हो पहिचानी वाम, तुम्है आजु मिलि कै कुटै ॥

अतदगुन लक्षण ।

संगतिहूँ गुन और को जहां लगत नहिं नेक ।
अतद्गुनालंकार तहँ बरनत कबि गहि टेक ॥

यथा ।

अंक में राखि निसंक सदा गत-बैस भई
जब तें लरिकारै । नीति अनीति सहीं सिगरी
हित रीति करी इनसों मनभाई ॥ गोकुल
पीतम को लखि दोस न रोस करौ सो कहौ
जू कहाई । प्रानपिया हिय रावरे को न सिखो
है उरोजन सों कठिनाई ॥ ५१० ॥

सोरठा ।

बसि बलि बलि के संग, रही सदा गुन सों गुहौ ।
तऊ न है गढ़ भंग, तो नीबी की कृपिनता ॥

अनगुन लक्षण ।

पर मनिङ्ग तें सिङ्ग गुन ताको जहँ उतकर्ष ।
अलंकार अनगुन तहां बरनत कवि गहि हर्ष ॥

यथा ।

राति जगे कहूँ रंगपगे यह जो समुझी तुम
सो सति नाही । नैनन की अरुनापनता लखि
के भ्रम भूरी भरी मन माहीं ॥ गोकुलनाथ स-
खा संग न्हात में केती तरंगनि में अवगाहीं ।
ह्वै गए औरज लाल सुनो परि रावरे की पग की
परछाहीं ॥ ५१३ ॥

सोरठा ।

बुधिवर कहत कठोर, गोपग्याति जनपांति में ।
तुम बलि बाढ़े ओर, बसे हिए तरुनीन के ॥
अरी लाज रहि जाय, यातें ब्रजबनितान की ।
परि पुतरी न लखाय, स्याम सलोनी गात में ॥

सामान लक्षण ।

बस्तु दोइ सम रूप को जुदी न चाही जाति ।
सो समान्य बेनीमिली अलिअवली न लखाति ॥

यथा ।

ओपभरे हैं ककू उभरे हैं करी विधि आ-
पने हाथ सँवारे । गोकुल रोमवली सों खिले
अलि की अवलीन को हैं प्रनधारे ॥ चारु सुगंध-
सने सुखमा सुचिरंग-रंगे सुकुमारता भारे ।
कौल-कलीन के हार मिले न लली लखि जात
उरोज तिहारे ॥ ५१७ ॥

मीलित लक्षण ।

बस्तु दोद्रु सम रूप की अवयव सो मिलि जाय ।
सो मीलित ज्यों दूध में पानी परि न लखाय ॥

यथा ।

हौं तो रही मन में डरतै गुन रावरे जानि
सबै बनमाली । जो उनकै पग जावक दै कै
हहा करि कै रति की रति पाली ॥ गोकुलनाथ
सबै कढ़तौ हित होती न जो कर को अरुनाली ।
लाल ककू कहतीं अलली परती लखि ज्यों
अंगुरीन की लाली ॥ ५१८ ॥

वैसेख्य लक्षण ।

मीलित में जहँ एक को बढि गुन धर्म लखाय ।
सो वैसेख्य मिले सलिल ज्यों मिश्रौ मधुराय ॥

यथा ।

मालती कौल कदंबनि छोड़ि सुवास की
आस लए सुखदेनी । आनंद रंगमए भए भौर
रहै बढि कै मढि कै चढि बेनी ॥ गोकुलनाथ
सुजान सही पै चली न कछू मति की गति
पैनी । लालहिं जानि परी सजनी करके परसें
अलकौ अलिसैनी ॥ ५२१ ॥

उन्मीलित लक्षण ।

जहँ मीलित गुन रूप को कछू भेद बिलगाय ।
उन्मीलित सुरसरि मिले ज्यों जमुनालखिजाय ॥

यथा ।

राति अंधैरी चितै नभ की सब स्याम सिं-
गार करे मृगनैनी । गोकुलनाथ चली हरि पै
ज्यों तामल पै जाति चली अलिसैनी ॥ हो हूं
गई सजनी संग पै न लखी पथ में अखियाँ करि
पैनी । बाल गई मिली कै तमजाल में जानि
सुवास परी सुखदेनी ॥ ५२२ ॥

गूढोत्तर लक्षण :

गूढोत्तर उत्तर जहाँ चतुरार्द्धजुत होय ।
घाट पथिक नीको जहाँ बाढ़ी घनी घमोय ॥

यथा ।

हाट मी लागति भौरन की कुसुंभीं लति-
 कान को कुंज घनो है । छांइछुई छिरकी म-
 करंद प्रिकीन को बृन्द न जात गनो है ॥ गो-
 कुल बूझत ही तौ कहौ जो अन्हाइवे को जमुना
 में मनो है । ठाट बढे सुख को लहिये वह
 जोवन के तट घाट बनो है ॥ ५२५ ॥

चित्रोत्तर लक्षण ।

चित्रोत्तर जहँ प्रश्न तें उत्तर कहौ न आन ।
 डूनको गयोरि मानको उनको गयोरि मान ॥

यथा ।

आनन चारु चलै चख है कुच-कोकन की
 उपमानता गोई । लौट परी लकि लंक लफै सटि
 जंघ नितंबन के भर भोई ॥ गोकुलनाथ सों
 बूझो हीं मै उन उत्तर मोहि दयो फिरि सोई ।
 जाति हुती घर को भरि कै जमुना तटते घट
 नागरि जोई ॥ ५२७ ॥

सूक्ष्म लक्षण ।

चित्तवृत्ति लखि और कौ चेष्टा व्यंग्य समेत ।
 करै जहां सूक्ष्म तहां कहत सुकवि जुत चेत ॥

यथा ।

खेलत गंजीफा हुती लाड़िली अली सों
आयो देवर परोसी जो हिए में हेलियतु है ।
जासो होइ सूरज सही सो डारि देहु कही स-
जनी सयानी यों हुकुम भेलियतु है ॥ गोकुल
मुजान जानि लयो जानिवे कों तीन कैसेहु
न पैअै मति ही को बेलियतु है । फेकि दयो
चंद चंदमुखी चातुरी सो चाहि पीतम कही
यों आछो खेल खेलियतु है ॥ ५२६ ॥

पीहित लक्षण ।

व्यंग्य सहित चेष्टा करै पर वृत्तान्तहि जानि ।
पीहित रतिग्रम खेद लखि बीजन दीन्हो आनि॥

यथा ।

आइयै बैठियै ऐंठियै आन न आपुन हौ
महाराज भहाजन । गोकुल हौं बलि जाति
चितौ गुनरावरे जानत कोऊ कहा जन ॥ और
कछू न कहौं इतनी कहि चातुर चारु छबीली
मुसाजन । धोइवे को मुख पीतम के टिग
आनि धखौ जल सों भरि भाजन ॥ ५३१ ॥

व्याजोक्ति लक्षण ।

जहँ कृपवै आकार कहि अन्य हेतु के बोल ।
व्याजउक्ति ओहि बाग सखि भौरन डसे कपोल॥

यथा ।

लावत कोऊ न पौरि पै पापिनि बैरी बरी
भरी-कांठक पेनी । बौरन सो कहियै री हहा
करि काटिबे जोग डूहै दुखदेनी ॥ गोकुल
चातुरतापन सों डूमि धाड़ु पै जाड़ु कछ्यौ मृ-
गनेनी । आवत हूं घर जात लगै फटि देखि
गई सिगरी उपरैनी ॥ ५३३ ॥

गूढोक्ति लक्षण ।

औरै प्रति उद्देस करि कहैं और सो बैन ।
सो जानत गूढोक्ति यह जिनकी मति अति पैन॥

यथा ।

देवर नन्द सखीन लए सब सासु गोसा-
इन तीरथ जैहैं । और परोसहुँ के सब लोग ते
जाइहैं बीच बसे फिरि ऐहैं ॥ गोकुलनाथ
लाख्यो लखतै दुख बैन कहे जे सुने सुखदै हैं ।

क्यों करि हौं या निसा सजनी इतने बड़े भौन
में एकली रहै ॥ ५३५ ॥

बिब्रतोक्ति लक्षण ।

गुप्त कहत अश्लेष जहँ कविजन सुमतिअगार ।
बिब्रतोक्ती उलंकार तहँ बुधजन को सुखसार ॥

यथा ।

आनंदरूप भरी रस सों जू भली बिधि सों
बिधि तोहि सँवारो । आपुनहो सब सौतिन के
तन जोवन को सिगरो मद गारो ॥ गोकुल चारु
सुवास-सनो मुख पंकज है बलि जाइ तिहारो ।
चोर भयो निसि दोस रहै यह भौर भटू पि-
यरे पटवारो ॥ ५३७ ॥

जुक्ति लक्षण ।

काहू के भै तें जहाँ छपिवे को आकार ।
क्रिया करै तहँ जुक्ति है जुक्तिभरो उलंकार ॥

यथा ।

देखतही हरि को पटओट भयो अलि जो
मन कंजकली को । देखि भखी यों लखी सखी

धाय कै हाय भलो न सँकेत गली को ॥ गो-
कुलनाथ कियो सो कहैं तब आइ उपाइ सुनो
नवली को । बैठि गर्द हँसिकै धसिकै पटओट
रही गहि पाय अली को ॥ ५३८ ॥

लोकोक्ति लक्षण ।

जहँ कहनाउति लोक की तहँ लोकोक्ति समाज ।
अरी नैन लागे जहां तहां कहा डर लाज ॥

आई तरुनाई ओप औरै अंग काई तेरे
अंगनि गोरार्इ की धसी सी धार चाहियै । नै-
नन की बैनन की अधर उरोजन की रोमअवली
की त्रिली की कहा कहियै ॥ गोकुल कहत
बोति गए ते बसंत फेरि अपनी अयान अप-
सोसन ही सहियै । आपुनही क्यों न मनमोहन
मिलैंगे सुनौ बोति गए पावस पयोधर उल-
हियै ॥ ५४१ ॥

अपरञ्च ।

बैरभरैं घरबारे गाउबारे धरै करैं स-
खिन को बैन सो करेजो कोड़ियतु है । तुम

आए जोग ल्याए भाए बैन भाखत हौं बारिह
की अति मति कैसे मोड़ियतु है ॥ गोकुल बि-
सासी लिखै पाती कछु ऐसी सुनो बाँचतही
जाके चितचैन छोड़ियतु है । जौलौ देह दोषी
यह तौलौं सब सहैं ऊधो जैसी बाढ़ बहै तैसी
पीठि ओड़ियतु है ॥ ५४२ ॥

छेकोक्ति लक्षण ।

जहँ परार्थ की कल्पना लोकउक्ति में होय ।
कहा अकेली तरनि जौ उयो तरैयनि खोय ॥

यथा ।

क्यों समुभावति हौ हमकों हम जानति
हैं कछु भेद न नीके । गोकुलनाथ भली तुमहूँ
तुमहूँ को लगै सिगरे जन नीके ॥ आए भयो
दिनचारि हमें बसी आपुन हौं कब की संगपी
के । जानत हैं जगतोतल में सुनौ साधु सबै
गुन साधुनही के ॥ ५४४ ॥

वक्रोक्ति लक्षण ।

काकुत्स्तेस में अर्थ पर जहां कहै निरदारि ।
अरी दान दे दूध के माँगे पैहौ चारि ॥

यथा ।

काम सतावतु है उनको कन बैठि रहै
श्रम की बहती है । प्रीतम के परसें सुख होत
उलूकन की बतियां नहती है ॥ गोकुल पौरिहि
पैं हरि हैं गहि डारि तिन्है जो ककू चहती है ।
री कलपावति है हम यों कल पावति हैं तो
कहा कहती है ॥ ५४६ ॥

काकु तें यथा ।

राति कहूं बहु कै रतिरंग चलै उठि कै
घर को हरि जैसे । औचक आन गली में
मिली ब्रषभानलली जू अली सुनि तैसे ॥
हेरि रही नख तें मिख लों करि गोकुल लोयन
लोल अनैसे । फूल की मालन सों गई मारि
कछो फिरि कै मिलिहौ हरि ऐसे ॥ ५४७ ॥

स्वभावोक्ति लक्षण ।

सुभावोक्ति वै जाति के कहिये जहां सुभाय ।
लखत लाल के नौलतिय लखिचख लेत चोराय ॥

यथा ।

भरि पाय घुघुरू निहारि नारि नाय लखै

अंचल उधारत गहत मनिमाल री । उतरत
चढ़त दुरत दौरि घुँटुवन उचकि उचकि पलका
पै हाल हालरी । गोकुल लसत चोटी नथुनी
तनक छोटी दतियाँ देखावै मुख बनक बिसाल
री ॥ ताकि मुख भाय को हँसत किलकत
क्यों न गोवै ताप नैनन को जोवै नंदलाल री ॥

यथा ।

आंगी फटैगी कहूँ तौ कहा कहि कै सह
वासिन मै बसिहै गी । * * * * * ॥ गो-
कुलनाथ न मानत हो हम लाजकी लेजन सों
फसिहै गी ॥ छोरी चुनौनि न नौबी की लालन
हेरि हमैं सजनी हसिहै गी ॥ ५५० ॥

अपरंच ।

अंग अलसाने पियराने यहराने पग ठहराने
परत सुडग मग मेंहै ना । छार्ड कुच स्यामतार्ड
चीकनार्ड केसन में नौबी उकसौंही भई त्रिवली
उचौहैं ना ॥ गोकुल कहत लाल लहैगी सलोनी
चढ़ि याके तन औरै चारुतार्ड चित ऐंचै ना ।

ठरकि सी भौहैं परी भरी भार लाजन के हर-
कि गर्व सी गति गदरावने नैना ॥ ५५१ ॥

भाविक लक्षण ।

भाविक भूत भविष्य को जहँ कहिये साक्षात् ।
अब हूँ देखि परै अरी वहै सांवरो गात ॥ ५५२ ॥

यथा ।

बार बड़ै बड़री अखियाँ मुख चारु उरोजन
ओज महा री । गोकुल रोमवली त्रिवली कटि
छाम महा लखि जात कहा री ॥ कालहि हती
जमुनातट पै नख तै सिखलौं भरी कामकला
री । नैनन में अबलौं है बसी वह न गरि नारि
बड़ी नथवारी ॥ ५५३ ॥

उदात्त लक्षण ।

स्लाघ्यचरित रिधि अन्य को अन्योपलक्षित होत ।
परसि उदात्त सु होत जन गंगाजी को सोत ॥

स्लाघ्य चरित यथा ।

तोरि कै पिनाक मान मोरि भृगुनंदन को
भगति के बस आए धीमर के धाम हैं । मारि

खरदूषण सँघारि बालि वीर कीन्हों सुगरीवै
राज रहै विपति ते छाम हैं ॥ बांधि सेत समुद्र
में रावन को जीति दई लंका में बिभीषण कीं
जाके ऐसे काम हैं । गोकुल जगतईस बीस
बिसे अभिराम जोग जपिवे के सुनो दासरथो
राम हैं ॥ ५५५ ॥

रिधि चरित यथा ।

हाथी दए घोरे दए जरिन के जोरे दए
और सुखपाल रथ गथन सो भोए हैं । मोतिन
के माला दए मनिन के जाल दए भूषण बिसाल
जो दमि लुति गोए हैं ॥ गोकुल कहत राम
राय को विवाह भए भिच्छुक न भूषण तें जुदे
जात जोए हैं । एतो दान दयो महाराज दस-
रथ देखो गुनिन के गन सों न धन जात ठोए
हैं ॥ ५५६ ॥

अत्युक्ति लक्षण ।

अत्युक्त्यतथ्य उदारता कही सूरता जौन ।
होत धनद भिच्छुक सुनो तुम सों मांगत तौन ।

यथा ।

आजु कौन तोसी बार बधुन के वृन्दन में
अमल अनूप गुन रूप सों बढ़ति है । तेरे मुख
अमित मधुर मुसुकानि सो है देखु निचुरी सी
चंदचन्द्रिका चढ़ति है ॥ गोकुल पियारे के हिया
रे हरिवे को तुंही काम जंच मंचन के तंचनि
पढ़ति है । एरा भागभरी तेरो तान की तरं-
गनि सों अंगनि अनंग की उमंगि सी मढ़ति
है ॥ ५५८ ॥

निरुक्ति लक्षण ।

निरुक्ति नाम के जोग तें अर्थ प्रकल्पन आन ।
क्यों न होहि माधौ खबस लखि बेनी मुखदान ॥

यथा ।

बकरा गहाइ देहु होहूं लैं डगरि जाऊं मुनो
भयो खरिका बिलोकें डरियतु है । नोखे कहा
होत ही अनोखी चोखी अंखियन सखिन के
आगे तौ न ऐसे अरियतु है ॥ बबाकी सों तोहि
हैहै दाज द्वारही पै मुनो गोकुल पियारे पतिही

को परियतु है । सोहत सुधाकर से आकर गुननि
भरे नीति करि लीन्हें हूं अनीति करियतु है ॥

अपरंच !

दूरिहि बैठी रहौ बरजैं जो भयो सो भयो
ऽब कछू न कहौ जू । आपुन को अपराध कछौ
न कछू तुम को बरजोर गहौ जू ॥ गोकुल जैसे
हौ तैसे भले हौ भलेन के संग भलाई लहौ जू ।
पाय परैं दुख देत महा हम जानत हैं न कहा
हरि हौ जू ॥ ५६१ ॥

प्रतिषेध लक्षण ।

प्रतिषिध प्रसिध निषेध को अनुकीर्तन अभिराम ।
है न अहीरिनि औरही राधे है सुनु स्याम ॥

यथा ।

गोकुलनाथ मने करिये अवहीं तुमको हित
सों ठरिबो है । श्रीठकुराइन राधिका के अति
दुस्तरही मन को हरिबो है ॥ कीऊ न कीऊ
कहैगो सुनो यहि गाँव चवाइन में डरिबो है ।
है इनसों हँसिबो री सुनो उनके यह पायन को
परिबो है ॥ ५६३ ॥

विधि लक्षण ।

जहँ विधान सिधिवस्तु को तहँ विधि २ सों भात ।
परै जौहरी के सु कर तब मनि मनि ठहरात ॥

यथा ।

चौसर चंदन सो चुपरे मुचि कंचन की
रुचि सों भरि भावैं । उन्नत पीन कठोर महा
मकरध्वज के करिकुंभ लजावैं ॥ गोकुल कंचुकी
बीच दुरे दुरि देखतहीं कुलकानि दुरावैं ।
लागत है प्रिय के हिय सों तब ओज भरे ते उ-
रोज कहावैं ॥ ५६५ ॥

हेतु लक्षण ।

हेतुमान के संग जहँ हेत कही तह हेतु ।
विघनहरन को सामुहें विघनेस्वर मुख देतु ॥

यथा ।

मानस सरोवर में फूलेई रहत तूले परमा
परम पूरे परिमल माम के । कोट कमनीय
रमनीय सुखमा के ओक लोक सब कीवे
को असोक अभिराम के ॥ गोकुल लखत राते
अरुन उदै लीं भरे भा ते हरै तिमिर अजान

आठौ जाम के । धरु रे मोदाम मन मधुप सुजान
मकरंद भरे कांज पद गुरु गुनधाम के ॥ ५६० ॥

अपरंच ।

दाहै न्याय पापपुंज बाहै पुन्यप्रथ पूर
साधुन की सिद्धि न कौ विपति बिधाहई । गुन
गन गाहै चारु चातुरी उमाहै चारो फलन की
राहै सुखदाहै नितही नई ॥ गोकुल सराहै सब
साहिबी की चाहै एक तूही तौ निबाहै सदा
सरन सतारई । माता भुवनेश्वरी तिहारी करुणा
कौ कोर खलन के दलन को मीच कालिका
भई ॥ ५६८ ॥

दोहा ।

भुवनेश्वरि जगदम्ब के भजियत चरनसरोज ।
गोकुलनाथ किया सकल अलंकार जुत चोज ॥

इति श्री काशीवासी रघुनाथकविसुवन
गोकुलनाथ कविकृत चैतचंद्रिका अलं-
कारकथनं समाप्तम् ॥